

宋文鑑

和 6
339
12



宋文鑑卷第六十三
表

進刑統表

竇儀

滁州謝上表

王禹偁

黃州謝上表

王禹偁

駕幸河北起居表

楊億

謝賜衣表

楊億

汝州謝上表

楊億

賀冊皇太子表

劉筠

謝直集賢院表

夏竦

進兩制三館牡丹歌詩狀

晏殊

侍讀學士等請宮中視學表

晏殊

謝除使相判相州表

韓琦

睦州謝上表

范仲淹



利
292
12

所錢文
有翰弄

謝轉禮部員外郎充天章閣待制表

進刑統表

范仲淹 竇儀

臣聞虞帝聰明始恤刑而御物漢高豁達先約法以臨人蓋此丹書輔于皇極禮之失則刑之得作於涼而弊於貪百王之損益相因四海之準繩斯在如銜勒之持逸駕猶郭郭之域羣居有國有家其來尚矣伏惟 皇帝陛下寶圖攸屬駿命是膺象日之明流祥光於有截繼天而王垂洪覆於無疆乃聖乃神克明克類河圖八卦惟上德以潛符洛書九章諒至仁而默感哀矜在念欽恤為懷網欲自密而疎文務從微而顯乃詔執事明啟刑書俾自我朝彌隆大典貴體時之寬簡使率土以遵行國有常科吏無敢侮伏以刑統前朝創始羣彥規為貫彼舊章采綴已從於撮要屬茲新造發揮愈合於執中臣與朝議大夫尚書屯田郎中權大理少卿柱國臣蘇曉朝散大夫大理正臣奚嶼朝議大夫大理寺柱國臣張希遜等恭承制旨同罄考詳刑部大理法直官陳光又馮叔向

等俱效檢尋庶無遺漏夙宵不怠綴補俄成舊二十一卷今并目錄增為三十一卷舊疏議節略今悉備文削出式令宣勅一百九條別編或歸本卷又編入後來制勅一十五條各從門類又錄出一部律內餘條准此四十四條附名例後字稍難識者音於本字之下義似難曉者并例具別條者悉注引於其處又慮混雜律文本注並加釋曰二字以別之務令檢討之司曉然易達其有今昔浸異輕重難同或則禁約之科刑名未備臣等起請總三十二條其格令宣勅削出及後來至今續降要用者凡一百六條今別編分為四卷名曰新編勅凡釐革一司一務一州一縣之類非干大例者不在此數草定之初尋送中書門下請加裁酌盡以平章今則可否之間上繫宸鑒將來若許頒下請與式令及新編勅兼行其律并疏本書所在依舊收掌所有大周刑統二十一卷今後不行臣等幸偶文明謬參憲法金科奧妙比虧洞達之能丹筆重輕徒竊討論之寄將塵睿覽唯俟嚴誅

滁州謝上表

王禹偁

罷直禁中臨民淮上雖離近侍猶忝正郎省已戴恩旣榮且懼伏念臣早將賤跡誤受聖知進身不自於他人立節惟遵於直道優游兩制出處八年今春召自西垣入叩內署旣在深嚴之地仍當繁劇之權雖積兢虞終無補報所宜遠貶以肅具僚伏蒙 尊號皇帝陛下曲直遭逢俯存終始止罷玉堂之職仍遷粉署之資委以專城置于近地沿流數日登陸三程諸縣豐登若無公事一家飽煖共荷君恩處之一生實爲萬足然而翰林學士朝廷近臣陛下登位已來御前放人之後從呂蒙正而下拜此職者止有八人臣最孤寒亦預其數言於聖選不爲不遜數月之閒忽然罷去眾情尙或驚駭微臣豈不憂惶且臣在內庭一百日閒五十夜次當宿直白日又在銀臺通進司審官院封駁司句當公事與宋湜呂祐之閱視天下奏章審省國家詔命凡于利害知無不爲三日到私家歸來已是薄暮先臣靈筵在寢骨肉衰經滿身縱有交

朋無暇接見不知謗議自何而興臣拜命已來通宵自省恐是臣所賃官屋在高懷德宅中一昨開寶皇后權厝之時便欲移出未去處尙不遑寧尋會指約公人不令呵唱切恐貴僧出入中使往還相逢之閒難爲顧揖自左右正言已上謂之供奉官街衢之閒除宰相外無所迴避此蓋賈誼所謂人君如堂人臣如陛陛高則堂高者也況臣頭有重戴身披朝章所守者國之禮容卽不是臣之氣勢因茲謝表敢達危誠況臣粗有操修素非輕易心常知於止足性每疾於回邪謂非其人誘之以利而不往事匪合道逼之以死而不隨唯有上天鑒臣此志伏望 陛下思直木先伐之義考眾惡必察之言曲與保全俾伸誠節則孤寒幸甚儒墨知歸在於小臣有何不足今則隨岸千里堯天九重微軀或遂於生還勁節尙期於死所

黃州謝上表

王禹偁

乍離近侍猶忝專城循省尤違彌深感泣伏以黃州地連雲夢城

倚大江唐時版籍二萬家稅錢三萬貫今人戶不滿一萬稅錢止
及六千雖久樂昇平尙未臻富庶永言養活亦藉循良如臣庸愚
曷副憂寄謹當勤求人瘼遵奉詔條窒塞囂訟之民束縛儉狷之
吏敢言課最庶免曠遺況當求理之朝必爲無言之政伏念臣叨
司帝誥又歷周星旣不會上殿求見天顏又不曾拜章論列時事
入直則閉閣待制退朝則杜門讀書雖每日起居實經年抱疾不
敢求假恐煩醫官自後忝預史臣同修實錄晝夜不捨寢食殆忘
己盡建隆四年見成一十七卷雖然未經進御自謂小有可觀忽
坐流言不容絕筆夫讒謗之口聖賢難逃周公爲鴟鴞之詩仲尼
有桓魋之歎蓋行高於人則人所忌名出於眾則眾所排自古及
今鮮不如此伏望 皇帝陛下雷霆霽怒日月迴光鑒會參之殺
人稍寬投杼察顏回之盜飯或出如簧未令君子之道消惟賴聖
人之在上況臣孤貧無援文雅修身不省附離權臣祇是遭逢
先帝但以心無苟合性昧隨時出一言不愧於神明議一事必歸

於正直愠於羣小誠有諂詞謀及卿士豈無公論以至 兩朝掌
誥四任詞臣紫垣最忝於舊人白首不離於郎署以微臣之行已
遇 陛下之至公久當辯明未敢伸理今則上國千里長淮一隅
雖云守土之榮未免謫居之歎霜摧風貶芝蘭之性終香日遠天
高葵藿之心未死仰望旒辰不勝涕洟

駕幸河北起居表

楊億

毳幕稽誅鑾輿順動羽衛方離於象魏天威已震於龍荒慰邊毗
後后之心增壯士平戎之氣臣聞涿鹿之野軒皇所以親征單于
之臺漢帝因之耀武用殲夷於兇醜遂底定於邊陲五材並陳蓋
去兵之未可六龍時邁因犯順以必誅矧朔漠妖氛腥膻雜類敢因
膠折之候輒爲烏舉之謀固已命將出師擒俘獻馘雖奪明王之
帳未焚老上之庭是用親御戎車躬行天討勞軍細柳之壁巡狩
常山之陽師人多寒感恩而皆同挾纊匈奴未滅受命而孰不忘
家行當肅靜塞垣削平夷落梟冒頓之首收督亢之圖使遼陽八

州之民得聞聲教榆關千里之地盡入提封蛇豕之穴悉降干戈之事永戢然後登臨瀚海刻石以銘功陟降雲亭泥金而典禮遠追八九之迹永垂億萬之年臣忝守方州莫參法從空勵請纓之志慙無扈蹕之勞唯聆三捷之音遠同百獸之舞

謝賜衣表

楊億

解衣之賜猥及於下臣挾纊之仁更均於列校光生郡邸喜動轅門伏以 崇文廣武聖明仁孝皇帝陛下誕膺元符恭臨大寶惠務先於逮下志惟在於愛人鳥獸毳毛俯及嚴凝之候衣裳在笥爰推賜予之恩在渙汗之所沾雖容光而必照如臣者任叨符竹地僻甌吳奉漢詔之六條方深祇畏分齊官之三服忽荷頒宣纂組極於織華純絲加於麗密璽書下降切窺雲漢之文駟騎來臨更重皇華之命但曳婁而增惕實被服以難勝矧於戎行亦膺天寵干城雖久皆無汗馬之勞守土何功獨懼濡鵠之刺仰瞻宸極唯誓糜捐

汝州謝上表

楊億

沈疴初釋寵寄荐臻祇命惟寅飭裝靡暇初臨郡閤獲見吏民揣已若驚戴恩罔措伏念臣本由單弱特稟方愚以童刻之微能際帝圖之亨會驟參綸掖獲草芝函屬以堯德彌文漢辭爾雅雲章有爛諫黼黻以何施天律惟精亦哇咬之罔棄居常摩厲徒益空疎俄踐內庭預司密命值皇闈之有慶扈清蹕以多歡窺雲瑞於封中聽棹歌於汾曲四巡第頌誠辯麗之絕聞二豎興妖致冥煩之坐邁偶嬰沈痼遂劇支離因請急以歸寧遽迷魂而不復率由蹇否自抵困窮矧以叢爾之軀熒然去職羈孤至甚毀嫉居多噴有煩言實盈庭之可畏豁然大度終如地以見容比及跽平果蒙齒敘此蓋 尊號皇帝陛下仁深慘怛德茂欽明軫舊故以興懷俾肖翹之遂性特加采錄令獲便安伏況臨汝舊邦陪京近輔姬文之化所及首載聲詩地官之籍攸分寔繁兵賦士多巖險民或惰游置使劭農抑惟令典分條察俗蓋有新書臣亦夙侍凝嚴僭

窺律度敢忘瘁盡以奉化成然念臣早以斷斷之薄材獲齒振
之近列典司訓誥就望威顏讀銘字於湯盤時瞻景式載史言於
董筆獲次舊聞舛命遺屯榮階絕迹酒泉素願敢望於生歸麗正
殘編幾成於死恨今者星畿接畛竹使長人預方國之頒書稟天
臺之布憲水深土厚足養於槁骸晝訪夕修冀無於秕政親末光
而彌阻感再造以難勝

賀冊皇太子表

劉筠

前耀開祥東闡播憲漢儀丕赫天下之本既豐周制協敷王者之
基克固殊尤顯會中外祇懽恭以十翼垂言黃離之象攸著四瀆
流潤重海之歌載揚于以示元吉之有孚表善利之需廣正人倫
而張大紀統天序而荷亨衢陪翼至仁登闕昌祚允鍾聖嗣克奉
宗祧伏以皇太子器本夙成智包妙用挺溫姿而玉裕藹淑度以
金相至性迪乎天經積粹發乎真系而自桂房毓秀茅壤疏榮有
時敏之進修有日躋之駿惠固以悟喬枝而奉順詢內衛以宣勤

務近老成之人歷觀盛德之事實忠信而由已服禮樂以蹈中造
理惟微振辭有典侍鑾游而儼若拱列欽瞻省臺膳以肅如慈宸
敦眷四學總於上序百行紀於司成洽乃懿聲被乎寰寓建儲之
論繫先親而是宜立愛之文稽古道而斯順肇膺徽冊有慶昌辰
伏惟 尊號皇帝陛下闢長世之善經率保邦之大法翕受祕祉
備舉縟儀上帝是忱克享於馨茂兆民咸賴用致於輯寧惟震長
之至賢實乾剛之上體三善靡煩於在傅重暉上契於秉陽 陛
下仰奉靈心旁招羣籲以為主器之重有國莫先矧錫羨於仙源
守在成於宗躅增崇巨業屬我元良龜猷之告協從神鑒之徵允
格三讓成德知天道之好謙明兩作離見皇圖之可大式備彌文
之禮仍新道德之稱涓以茂辰膺茲鴻典班輪飭駕奮五采以相
宣碧鏤題宮配二儀而胥永臣以濫叨職竊守藩封昭數在庭
莫覲鑾旌之美含和發詠率同鳧藻之誠

謝直集賢院表

夏竦

北門禁省給青簡以試言東觀直廬降紫泥而命職莫道假人之
 刺彌彰遇主之榮竊以承明設待詔之官實漢朝之方潤麗正啟
 修書之院乃唐氏之英華濬圖書之淵敞龍鳳之宇自非弓裘繼
 世章句名家通授義畀似之靈篇閑書笏珥彤之故事則何以繼
 成康之美頌考宣武之懿文陪法從於甘泉奉宸游於屬玉況當
 聖日允屬簡求如臣者學不傳經文非近史青青子佩雖見刺於
 勞心翹翹錯薪亦濫期於刈楚筮仕勝衣之歲薦名象日之畿方
 博帶以觀光遽墨衰而沿牒尋遇國家誕敷尺詔增廣六科方棲
 枳以徒勞遂上封而自薦始較文於鼇苑旋試可於鼎司亟趨文
 石之墀遂忝延英之問擊轅度曲敢望於九成縈帶分墉俄登於
 百雉陸象河之屬吏佐分虎之方州爰受代於瓜時遂歸朝於幄
 坐典陳陳之粟閱山委之邱區從九九之車總絲琴之案牘暨還
 衡睢壤舍爵太宮既諧引籍於金閨將佐于藩於熊軾又慮沈迷
 簿領廢墮簡編負公朝振舉之科宰聖主詳延之意遂殺青而奏

枚果出綽以推恩禁林俾試於雕蟲書殿遽令於抱槩闕上帝之
 冊府目眩星辰登道家之蓬山足踐雲氣奉長者之餘論與先生
 而並行分直石渠地接嚴更之守縱觀金匱門連著作之廷載惟
 螻螻之軀莫報乾坤之賜恭惟 尊號皇帝陛下事寢廟以至孝
 奉靈祇而克誠流鴻藻於絕垠鏗景炎於往號以文明而行健體
 柔克以居高縱觀唐漢之大猷備舉黃虞之故實睿藻和而六同
 韻天章麗而五佐飛恢崇務廣於斯文獎擢不遺於小道遂使至
 孤之士獲塵非次之恩東陸遽擬於西山羔裘遂登於狐腋歌衛
 風而合雅鬻齊紫而雜良誠當潔節於素絲敢不盟心於白水益
 三思而出話彌九復以窮經永冰淵惕勵之心奉日月照臨之鑒
 庶追素飧之謗仰疇明主之知媿懼所深兢惶不已

進兩制三館牡丹歌詩狀
 晏殊

臣准傳宣劄子奉聖旨令兩制三館賦後苑諸殿亭牡丹歌詩者
 化合天人祥開卉木協風靈雨散為膏壤之滋共蒂并柯布在密

清之園畫品難形於卓異瑞圖不盡於芳妍乃詔儒臣各摘華藻
匪太平之特盛豈榮遇之及茲昔者虞舜膺期有皋陶之賡載周
宣繼業聞吉甫之誦章蓋默助於謨猷不專工於辭翰迨于漢室
尤好藝文別館離宮多命從臣之制作倡優鄭衛已無前古之箴
規中葉以還其風未泯永平神雀之頌孝明稱美者五人正元重
九之篇德宗考第於三等並垂編簡式著熙隆洪惟聖運之會昌
可繼重華之輝耀然於眾製未復前修思諷諭者隱其誠而靡宣
局聲律者艷其言而罕實不足以裨睿覽下達民情效明良喜
起之音續雅頌清微之範姑用登高而能賦庶幾博奕之猶賢罔
叶精求豈任多愧臣首當庸濫實玷恩華興寤以思覩惶無極其
兩制并侍講學士龍圖閣待制自章得象已下十三人三館祕閣
自康孝基已下二十七人歌詩共一百四十首謹隨狀進以聞

侍讀學士等請宮中視學表

晏殊

伏奉聖旨以時暑暫住講書至秋涼仍舊者運當文治日視講筵

以炎暑之盛隆遂紫宸之游息載頌明旨允合舊章伏惟 皇帝
陛下應運挺生代天化育御承光之法座臨照九圍奉長樂之慈
顏緝熙萬務緬懷 三聖撫愛兆民知王業之艱難識帝模之宏
遠於是順稽古道崇尚素風命冊府之儒臣敝金華之經席包周
眾說既析於篇題齊魯善言彌勤於聽覽屬南薰之屆候憫會弁
之增勞暫錫假寧聿昭恩遇臣等退惟鄙質幸此親逢敢忘矇瞽
之言仰效涓毫之助切以四方無事百度允釐宮禁之閒穆清多
豫伏願重漢皇之六學惜夏禹之寸陰時習所聞愈精大義閒揮
仙翰式就神功彰睿德之日新廣鴻猷之天賦如此則宗祏景福
贊明主之保邦夷夏仰瞻識大朝之垂教

謝除使相判相州表

韓琦

宰職隳功莫副宵衣之治鄉邦得請重叨書錦之行被恩典之特
優顧人言而甚愧伏念臣早繇科第遂玷寵榮不圖翰墨之進身
自竭涓塵而報國備員諫諍幾不免於竄投奮命疆陲實荐罹於

艱阻獨恃聖神之眷誰開援助之言 仁宗皇帝知其守以孤忠
謂可屬之大事慶歷之始已擢貳於樞機嘉祐之中乃進登於宰
輔俄膺冢任益荷殊知當 英廟之承祧逮 聖人之嗣服稠重
遭會罄竭愚庸惟知社稷之安豈顧家宗之末然而萬微多務一
紀妨賢為國持平敢自私於輕重裁人所慾固難免於愛憎加疾
疹之嬰纏若形神之耗弊勉訖因山之禮懇陳上印之宜伏蒙
皇帝陛下念犬馬之力易衰廓日月之明為照不罪再三之請亟
垂開可之音進秩地官剖符粉社建高牙之重既疏淮海之封增
故里之光仍襲貂蟬之舊叨塵之甚今古疇偕敢不思盡瘁於寢
興泯寘懷於內外在邊在庭之責惟驅策以當前益堅益壯之心
至糜捐而後已

睦州謝上表

范仲淹

獻言罪大輒效命於鴻毛宥過恩寬迴迴光於白日事君無遠為
郡甚榮恭惟 皇帝陛下天德清明海度淵默撫羣龍以宅吉念

六馬而懷驚臨軒以來側席不暇思啟心沃心之道獎危言危行
之臣萬寓咸歡九門無壅臣腐儒多昧立誠本孤謂古人之道可
行謂明主之恩必報而況首膺聖選擢預諫司時招折足之憂介
立犯顏之地當念補過豈堪循默昨聞中宮搖動外議宣騰以禁
庭德教之尊非小故可廢以宗廟祭祀之主非大過不移初傳入
道之言則臣遽上封章乞寢誕告次聞降妃之說則臣相率伏閤
冀回上心議方變更言亦翻覆臣非不知逆龍鱗者掇蠶粉之患
忤天威者負雷霆之誅理或當言死無所避蓋以前古廢后之朝
未嘗致福漢武帝以巫蠱事起遽廢陳后宮中殺戮三百餘人後
及巫蠱之災延及儲貳至宣帝時有霍光妻者殺許后而立其女
霍氏之釁遽為赤族又成帝廢許后咒詛之罪乃立飛燕姊妹妬
甚於前六宮嗣息盡為屠害至哀帝時理之即皆自殺西漢之祚
由此傾微魏文帝寵立郭妃諧殺甄后被髮塞口而葬終有反報
之殃後魏以虜庭不典高后為尼危辱之朝不復可法唐高宗以

王皇后無子而廢武昭儀有子而立既而摧毀宗廟成竊號之妖
是皆寵衰則易搖寵深則易立後來之禍一一不善臣慮及幾微
詞乃切直乞存皇后位號安於別宮暫絕朝請選有年德夫人數
員朝夕勸導左右輔翼俟其遷悔復于宮闈杜中外覬望之心全
聖明始終之德且黔首億萬戴 陛下如天皇族千百倚 陛下
如山莫不雖休勿休日慎一日外采納於五諫內彌縫於萬機而
況有犯無隱人臣之常面折庭諍 國朝之盛有闕卽補何用不
臧然後上下同心致君親如堯舜中外有道躋民俗於義皇將安
可久之基必杜未然之釁上方虛受下敢曲從既竭一心豈逃三
黜伏蒙 陛下皇明委照洪覆兼包贖以嚴誅授以優寄郡部雖
小風土未殊靜臨水木之華燕處江湖之上但以肺疾綿久藥術
鮮功喘息奔衝精意牢落惟賴高明之鑒不投遐遠之方抱疾于
茲爲醫尙可苟天命之勿損實聖造之無窮樂道忘憂雅對江山
之助含忠履潔敢移金石之心

謝轉禮部員外郎充天章閣待制表

范仲淹

渙渥自天震惶無地啟中臺之華序進內閣之清班盡出高明殊
登祕近竊念臣發自顏巷賓于舜門一第爲榮四方無效爰自書
林預選桂籍升華恥汨沒以懷安或感激而論事惟慕古人之節
詎希英主之知伏惟 尊號皇帝陛下稟帝堯之聰明加漢高之
豁達坦聖懷而虛受期鴻化以成孚念 三聖之艱難而成丕業
求七人之蹇諤以補大猷臣猶愧非才首當清問危言多犯孤立
自持斧鉞居前雷霆在上敢避樞機之禍終乖藥石之良 陛下
日月垂光江海敦量恕其萬死假之一麾望已絕於青雲咎未更
於鴻需俄易藩宣之寄寧分旰昃之憂忽降綸章荐加寵數而況
闢圖書之府叨處於深嚴踐雲龍之庭當備于顧問非名儒而不
稱豈曲士之能堪矧濫清遭仍居澹治輝榮大集志願何求敢不
內守朴忠外修景行進退惟道遵聖賢視履之方始終一心副君
父育材之造

宋文鑑卷六十三

宋文鑑卷六十四

表

辭起復表

富弼

謝知制誥表

歐陽修

賀平貝州表

歐陽修

謝復龍圖閣直學士表

歐陽修

南京留守謝上表

歐陽修

謝覃恩轉官表

歐陽修

謝宣召入翰林狀

歐陽修

乞罷政事表

歐陽修

亳州謝上表

歐陽修

乞致仕表

歐陽修

謝賜漢書表

歐陽修

謝止散青苗錢放罪表

歐陽修

乞致仕第二表

歐陽修

乞致仕第三表

歐陽修

進修唐書表

歐陽修

賀南郊大赦表

宋祁

賀生皇子表

宋祁

代人乞出表

宋祁

辭起復表

富弼

喪次銜哀甫終卒哭使華傳命繼至敝廬心積驚憂情深屠裂雖
屢傾於丹懇尚未錫於俞音天遠莫量物微難動不避褻煩之咎
更陳隕絕之詞必冀神聰俯從哀請伏念臣早罹家難偏奉母慈
猥以蠢愚最鍾愛育享祿未幾遽纏風樹之悲報德永違徒懷霜
露之感寢苦枕塊而適抱至痛食稻衣錦則若為自安實非人情
尤紊邦制況今中外無事左右得賢共輔聖明之期安有曠曠之
務曲蒙下詔更起孤臣在 陛下馭國之方蓋欲不遺於舊物於

朝廷敦化之道必恐有誤於蒼生何須稽故事以遂前世之非正
可存禮經以圖今日之善行之即是義不為難豈惟於 陛下有
復古之風抑亦俾愚臣得事親之道一為匪戾兩得其宜兼臣悲
傷之餘衰病交至精力已耗神觀未還假使充員豈堪應務苟令
終畢於祥禫庶幾稍復於幹魂得此從容可備驅策伏望 尊號
皇帝陛下日月臨照天地包容盡母氏平生之恩憐人子罔極之
苦曲矜末志得滿鉅憂生意凋零或尚未捐於溝壑清光咫尺終
期伏望於雲天悲感增深懇願兼劇

謝知制誥表

歐陽修

伏以王者尊居萬民之上而誠意能與下通奄有四海之大而惠
澤得以徧及者得非號令誥詔發揮而已哉然其為言也質而不
文則不足以行遠而昭聖謀麗而不典則不足以示後而為世法
居是職者古難其人乃以愚臣而當此選伏惟 尊號皇帝陛下
茂仁聖之姿荷 祖宗之業日謹一日曾未少懈而自羌戎負固

邊鄙用師勤儉率先於聖躬焦勞常見於玉色雖有憂民之志而億姓未蘇雖有欲治之心而羣臣未副故每進一善則未嘗不欲勸天下之能每官一賢則未始不欲盡人材之用雖以爵祿而砥礪尚須訓誡之丁寧尤假能言以諭至意可稱是者不又大作用歟伏念臣雖以儒術進身本無辭藝可取徒值嚮者時文之弊偶能獨守好古之勤志欲去於雕華文反成於樸鄙本懼不適當世之用敢期自結聖主之知陛下獎之特深用之太過此臣所以懇讓三四至於辭窮而天意不回寵命難止尚慮頑然之未諭更加使者以臨門恩出非常理難屢瀆及俯而受命伏讀訓辭則有必能復古之言然後益知所責之重夙夜惶惑未知所措伏況文字之職廁于侍從之班在於周行是為超擢不徒揮翰以為效自當死節以報恩惟所使之期於盡瘁

賀平貝州表

歐陽修

盜藁竊興神祇共忿果憑睿算悉殄兇徒伏惟尊號皇帝陛下推

仁育物浸澤在人常服儉以躬行惟足兵而在念至於多捐金幣講好戎夷務休戰爭蓋惜士卒德至深而莫報恩既厚則生驕敢肆妖狂自干斧鉞脅驅士眾閉守城闔既違天而逆人宜不攻而自破而况聖神運略將相協忠不遺一人咸即大戮悖慢者警而肅恪昏愚者知有誅夷銷沮姦萌震揚威令臣幸忝郡寄忻聞德音

謝復龍圖閣直學士表

歐陽修

思還舊職事雪前誣感極心驚涕隨言出臣伏見前世材賢之士身結主知勳德之臣功施王室然尚或一遭謗毀欲辨無由少忤要權其禍不測顧如臣者何足道哉臣材不迨於中人功無益於當世用之未見有效去之無足可思矧罔極之讒交興而並進易危之迹何恃而不顛而聖心不忘恩意特至辨罔欺於藹昧沮仇嫉於眾多雖暫居譴謫之中而屢被陞遷之渥今又特蒙甄錄牽復寵名以臣之愚豈比前人而獨異推其所幸蓋由聖主之親逢

謂宜如何可以論報再念臣稟生孤拙本乏藝能徒因學古之勤
粗識事君之節苟臨危効命尙當不顧以奮身況爲善無傷何憚
竭忠而報國誓期盡瘁少答高明

南京留守謝上表

歐陽修

守宮鑰之謹嚴敢忘夙夜布政條之纖悉上副憂勤寄任非堪兢
營並集伏念臣賦才庸薄稟數奇屯毀譽交興兩嘗過實寵榮踰
分動輒招尤念報效之未伸敢不竭忠而盡瘁因風波之可畏則
恩遠去以深藏迨此六年外更三守學偷安而杜口負素志以媿
心朽質易衰已凋零於齒髮良時難得尙希慕於功名豈謂皇慈
未捐舊物擢從支郡委以名都惟此別京舊當孔道簿領少勤於
職事廚傳取悅於路人苟循俗吏之所爲雖能免過非有古人之
大節未足報君

謝覃恩轉官表

歐陽修

天地號令風雷鼓行一氣所均萬物咸被遂容僥倖亦與褻升伏

念臣材不逮人識非慮遠徒有事君之節未知報國之方冒寵
貪榮已踰其量見利臨得曾不知慙此者伏遇 尊號皇帝陛下
堯舜聰明禹湯勤儉修前王之曠典述先志以繼成昭致精禋躬
臨路寢膺受上天之多福推與萬方而不私臣於此時限以官守
講儀制禮不與議郎博士之流助祭陪祠不在諸侯方物之列旣
乏一言之獻又無執事之勞徒隨翟闈共享餘賜普天率土難異
眾以 獨辭踳厚踳高但撫躬而無措

謝宣召入翰林狀

歐陽修

使車八里君命在門閭巷驚傳豈識朝廷之故事縉紳竦歎以爲
儒者之至榮在臣之愚何以堪此竊以文章之任自古非輕待遇
寵榮至有私人之目詢謀獻納因加內相之名恩旣異於常倫人
愈難於稱職伏念臣器非宏遠識匪該明學不通古今之宜材不
適方圓之用久叨塵於侍從曾莫著於勞能而自出守外藩近遭
家禍苟存餘喘復齒周行風波流落者十年天日再瞻於雙闕進

對之際已蕭颯於霜毛慰勞有加賜憫憐於玉色形神若此志意可知身已分於早衰心敢萌於希進加以羈危之迹仇嫉交攻進退動繫於羣言論議多煩於睿聽雖覆載之造每賜保全而孤蹇偷安常思引去敢謂伏蒙 尊號皇帝陛下俯憐舊物曲軫宸慈因內署之闕員俾備官而承乏之臣敢不勉尋舊學益勵前修感遺簪未弃之仁竭駑馬已疲之力庶伸薄効少答鴻恩

乞罷政事表

歐陽修

臣聞士之行已所重者始終之不渝臣之事君所難者進退而合理苟無大過善退其身昔之爲臣全此者少臣頃侍 先帝屢陳斯言今之懇誠蓋迫於此伏念臣識不足以通今古材不足以語經綸幸逢盛際之休明早自諸生而拔擢方其與儒學文章之選居言語侍從之流每蒙過獎於羣公常媿虛名之浮實暨晚叨於重任益可謂於得時何嘗敢傷一士之賢豈不樂得天下之譽而動皆臣忌毀必臣歸人之愛憎不應遽異臣之本末亦豈頓殊蓋

以處非所宜用過其量惟是要權之地不勝指目之多周防所以履危而簡疎自任委曲所以從眾而拙直難移宜其舉足則蹈禍之機以身爲斂怨之府復盤桓而不去遂謗議以交興讒說震驚輿情共憤皇明洞照聖斷不疑孤臣獲雪於至寃四海共忻於新政至於賴天地保全之力脫風波險陷之危使臣散髮林邱幅巾衡巷以此沒地猶爲幸民況乎擁蓋垂簷其榮可喜撫民求瘼所寄非輕苟可效於勤勞亦寧分於內外伏望 皇帝陛下曲回天造俯察愚衷許解劇繁處之閒僻物還其分庶獲遂於安全心非無知豈敢忘於報効

亳州謝上表

歐陽修

貳政非才雖獲奉身而退分符善地猶懷竊祿之慚祗荷寵靈惟知戰懼伏念臣章句腐儒之學也豈足經邦斗筭小器之量也寧堪大用而叨塵二府首尾八年荷三朝之誤知罄一心而盡瘁若乃樞機宜慎而見事輒言陷奔當前而橫身不避竊尋前載未有

能全一昨怨出仇家構爲死禍造謗于下者初若含沙之射影但期陰以中人宣言于廷者遂肆鳴梟之惡音孰不聞而掩耳賴聖神之在上廓日月之至明悉究罔誣遂投讒賊再念臣性實甚愚而疎於接物事多輕信者蓋以至誠如彼匪人失於泛愛平居握手惟期道義之交延譽當朝常丐齒牙之論而未乾薦禰之墨已彎射羿之弓知士其難世必以臣爲戒常情共惡人將不食其餘而臣與遊既昧於擇賢在滿不思於將覆自貽禍費幾至顛躋上煩睿聖之保全得完名節於終始洎懇辭於重任尤深惻於皇慈雖避寵辭隆僅能去位而清資顯秩愈更叨榮莫逃僥倖之譏實負心顏之覲斯蓋伏遇 皇帝陛下乾坤大度堯舜至仁察臣自取於怨仇本由孤直憫臣力難於勉彊蓋迫衰殘旣獲免於非辜仍曲從於私欲遂同萬物俾無失所之嗟未盡餘生敢忘必報之効

乞致仕表

歐陽修

臣近貢封章乞還官政伏奉詔答未賜允俞退自省循奚勝殞越臣聞神功不幸而萬物得以曲成者惟各從其欲天鑒孔昭而一言可以感動者在能致其誠敢傾虔至之心再續高明之聽伏念臣本以一介之賤叨塵二府之聯知直道以事君每師心而自信然而旣乏捐軀之効又無先覺之明用之已過其分而曾不自量毀者不堪其辱而莫知引去幸賴乾坤之再造得逃陷穽之危機仍許避於要權俾退安於晚節今乃苦於衰病莫自支持顧難冒於寵榮始欲收於骸骨敢期聖念過軫天慈謂雖迫於桑榆未忍弃於草莽竊以古今之制沿襲不同蓋由兩漢而來雖處三公之貴每上還於印綬多自駕於車轅朝去朝廷暮歸田里一辭高爵遂列編民豈如至治之朝深篤愛賢之意每示隆恩之典以勸知止之人故雖有還政之名而仍享終身之祿固已不類昔時之士無殊居位之榮然則在臣素心雖切退休之志迹臣所乞尙虞僥倖之譏伏望 皇帝陛下惻以深仁矜其至懇俾解方州之任遂

歸環堵之居固將優游垂盡之年涵泳太平之樂惟辛勤白首迄無一善之稱孤負明時莫報 三朝之德此為慙恨何可勝陳

謝賜漢書表

歐陽修

俯躬承命拭目生輝竊以右文興化乃致治之所先著錄藏書須太平而大備惟漢室上繼三代之統而班史自成一家之書文或舛訛蓋其傳之已久詔加刊定俾後學之無疑一新方冊之文增煥祕書之府而奏篇之始方經衡石之程賜本之榮惟及鈞樞之近敢期孤外特與恩頒此蓋伏遇 皇帝陛下曲軫睿慈俯矜舊物謂其嘗與臣鄰之列不忍遽遺憐其自喜文字之閒俾之娛老然臣兩目昏眊雖嗟執卷之已艱十襲珍藏但誓傳家而永寶

謝止散青苗錢放罪表

歐陽修

有罪必誅是為彝典原情以恕特出深仁聞命驚慚省躬涕泗伏念臣以一介之微賤荷 三聖之獎知寵祿既豐初無報効筋骸已億尚此遲徊曲蒙大度之并容誤委一方之寄任職當撫俗責

在分憂方茲旰昃之勞心豈敢因循而避事昨遇國家新建官司而主計大商財利以均通分命出使之車交馳於郡縣悉發舊藏之鏹取息於農氓而臣方久苦於昏衰初莫詳其利害既已大誼於物議始知不便於人情亦嘗略陳眾弊之三冀補萬分之一屬再當於班給顧已逼於會期雖具奏陳乃先擅止據茲專輒合被譴呵豈謂伏蒙 皇帝陛下深軫睿慈俯矜朴拙免從吏議特貸刑章夫何草木之微曲被乾坤之施臣敢不益思祗畏更勵操修戒小人之遂非希君子之改過冀圖薄効少答鴻私

乞致仕第二表

歐陽修

睿訓丁寧曲加慰諭愚衷懇迫尚敢黷煩將再干於冕旒宜先伏於砧鑕伏念臣世惟寒陋少苦奇屯識不達於古今學僅知於章句名浮於實用之始見於無能器小易盈過則不勝於幾覆徒以早際千齡之亨會誤蒙 三聖之獎知寵榮既溢其涯憂患亦隨而至稟生素弱顧身未老而先衰大道甚夷嗟力不前而難彊每

念恩私之莫報兼之疾病以交攻爰於守毫之初遂決竄漳之計
逮此三遷於歲律又更兩易於州符而犬馬已疲理無復壯田廬
甚邇今也其時是敢更殫螻蟻之誠仰冀乾坤之造況今時不乏
士物咸遂生鳧鴈去來固不為於多少鳶魚上下皆自適於飛潛
苟遂出於殘骸庶少償其夙志伏望 皇帝陛下哀憐舊物隱惻
至仁察其有素非偽之誠成其識分知止之節曲從其欲賜報曰
俞俾其解組官庭還車故里披裘散髮逍遙垂盡之年鑿井耕田
歌詠太平之樂其為榮幸曷可勝陳

乞致仕第三表

歐陽修

恩深煦嫗感極涕洟雖情有迫於危心不知自止而辭已窮於累
牘幾至無言惟以至誠期於必達自乞憐於君父不復訊於蒼龜
伏念臣家世單平性姿中下少從宦學本免飢寒不自意於遭逢
遂進階於華顯然而羣材方茂蒲柳未秋而早衰眾駿並馳駑駘
中道而先乏而沉荷難勝之任用竊逾分之寵榮風波憂畏而慮

以深疾病侵凌而老亦至故自辭於機政即願謝於軒裳蒙 上
聖之至仁念 三朝之舊物每曲煩於訓諭久未忍於弃捐竊惟
臣知事君必本忠信言不顧行是為罔欺而臣口日誦於田閭身
坐貪於祿利可畏至公之議何施有覲之顏每自省循莫遑啟處
是敢罔避再三之煩黷猶希萬一之矜從伏望 皇帝陛下特軫
天慈俯回睿聽察前言之可復蓋屢請者有年哀下愚之不移俾
卒成於素志徇其所欲乞以殘骸臣若得上印綬於有司自駕柴
車而即路晚節知無於大過沒身永荷於鴻私

進修新唐書表

歐陽修

竊惟唐有天下幾三百年其君臣行事之始終所以治亂興衰之
蹟與其典章制度之美宜其粲然著在簡冊而紀次無法詳略失
中文采不明事實零落蓋又百有五十年然後得以發揮幽昧補
緝闕亡黜正偽謬克備一家之史以為萬世之傳成之至難理若
有待伏惟 尊號皇帝陛下有虞舜之智而好問躬大禹之聖而

克勤天下和乎民物安樂而猶垂心積精以求治要日與鴻生舊學講誦六經考覽前古以謂商周以來為國長久惟漢與唐而不幸接乎五代衰世之士氣力卑弱言淺意陋不足以起其文而使明君賢臣雋功偉烈與夫昏虐賊亂禍根罪首皆不得暴其善惡以動人耳目誠不可以垂勸戒示久遠甚可歎也乃因邇臣之言適契上心之所閱於是刊修官翰林學士兼龍圖閣學士給事中知制誥臣歐陽修端明殿學士兼翰林侍讀學士龍圖閣學士尚書吏部侍郎臣宋祁編修官禮部郎中知制誥臣范鎮刑部郎中知制誥臣王疇太常博士集賢校理臣宋敏求祕書丞臣呂夏卿著作佐郎臣劉義叟等並膺儒學之選悉發祕府之藏俾之討論共加刪定凡十有七年成二百二十五卷其事則增於前其文則省於舊至於名篇著目有革有因立傳紀實或增或損義類凡例皆有據依纖悉綱條具載別錄臣公亮典司事領徒費日月誠不足以成大典稱明詔無任慙懼戰汗屏營之至

賀南郊大赦表

宋 祁

帝儀訖饗朝渙推慈飛驛疾傳庶邦叢慶切以天郊之重國制有常凡萬乘躬行必三歲間往不煩不怠由列聖而持循以妥以虔合諸神而哀對睿圖累盛縟典勤修恭惟 尊號皇帝陛下纂大合華執中布度抵金璧之珍玩率儉示人收霜電之嚴慄措刑于下克勵明德格于皇穹交熏太和冒我羣品顧懷時億瑞應日來亟戴上儀若祇舊典戒期百執領詔九州曳雲威之常羊服翠蚪之泮渙殊庭一獻諸祐徧躋遂自陽靈之宮往會天元之旦羽旄四合垓陞參登上璧左琮之華合袂而信祝祖 蕤宗題之次更侑而迪嘗拜嘉胙於席垂列欽柴於雲表靈心合答熙典備成然後還坐中天之闈普肆隨風之澤改頒大號崇冠初元昭神之祥祈命惟永賞功赦罪已責逮瘵咸與惟新牖民衷而遷善聿懷多福道帝祉於緜區盛際有光彝倫咸賴臣嚮官舊吏殫見往朝或不愛牲玉為恭殊非明薦或所過租賦為復蓋出重勞語昔罕全訂

今絕擬所恨清塵在望自苦周南之留紫橐仍持不與甘泉之從
第班恩諭均浹歡悰

賀生皇子表

宋 祁

寶祐叢休天支毓秀慶騰秘禁歡溢中區恭惟 尊號皇帝陛下
受命溥將疑圖丕赫權綱相又根乎克念之虔簡素所安表于不
勉之懿且復欽刑薄賦重穀弛畋一方少饑則係馳使節萬金稍
乏則輒續禁錢民用靖嘉神罔恫怨是以上帝歆佑三后顧存詒
美孫謀昭衍無疆之烈歸功元首茂啟多男之祥誕協仲商挺生
哲嗣星弧具禮天第交華惟翁闈之儲英固覃訏而絕異逃聆詔
諭並仰獻儀薦笏相趨抃吾君之有子珪璋流愛宜天下之繫心
臣始去近聯遠承吉語賡歌縣陟早知周德之遐參祝祠禩罔逮
漢臣之幸

代人乞出表

宋 祁

臣聞物勝於權則衡爲之殆馬竭其力則御速於顛蓋以器循量
而易施材過求而難勉是以功名之際惟髦士可居彊力之容匪
暮年勝任將傾危懇敢援斯言竊念臣本以邱樊託于經術幸逢
先烈超備從官服上教之彌文因至愚而取信出入丹禁無所建
明履歷藩宣茂聞條教 尊號皇太后陛下 尊號皇帝陛下奉
承謨訓過聽空疎簡服在庭兼容如地雖百度之治咸使與聞每
萬機之餘常參勸講七周成歲訖乏寸長惟君知臣足以驗其無
用惟國有典不可道於黜幽且臣自知甚明內省尤熟以一介之
鄙賤丁千載之會昌邑戶餐錢非祿之不厚高冠大佩非位之不
崇同僚皆賢非志之不合處奏多可非言之不從固當勉服攸箴
謹修爾職答乃聖之眷遇爲斯文之寵光其如犬馬齒衰桑榆景
薄中年則病奪其壯晚節則務傷於神辨色立朝足居多於跛倚
書思記命目不辨於馬烏而臣頃自去秋願辭近職上恩不聽寵
渥就加逮僮俛以及茲且瘵昏而益甚事皆忘誤疾愈疴瘥顧四
體之已疲宜一辭而後止重念臣之鄉籍世占鄆州旣託枌榆薄

營產利不勝首邱之志願諧剖竹之行庶及餘年聊蘇疲瘵况前朝邢昺本貫曹州亦自禁廬得臨鄉部臣今所請似有前規伏望陛下念舊物之不可遺憫孤生之老且至特垂寬詔俾守先廬諒亦大君進退之間微臣止足之分萬無纖介可貽累於至仁一切便宜尚力思於臥治仰干睿鑒伏俟嚴誅

宋文鑑卷第六十四

宋文鑑卷第六十五

謝衣襖表	宋	祁
謝換龍閣表	宋	祁
謝加端明表	宋	祁
代陳州章相公乞致仕第一表	宋	祁
乞致仕表	張	方平
服闋謝復官表	孫	沔
揚州謝上表	劉	敞
謝加學士表	劉	敞
賀皇長子封公表	王	拱辰
永興謝上表	司	馬光
進資治通鑑表	司	馬光
蘄州謝上表	呂	誨

乞致仕表

呂海

潭州通判謝上表

唐介

賀冊皇妃表

王安石

賀生皇子表四首

王安石

漳州進珠表

王冕

謝衣襖表

宋祁

冬籥乘辰裘官著令疾馳使駟臨撫塞屯並頒齊竒之良均挾吳
絲之煖被躬且吉束帶有華伏惟 尊號皇帝陛下至德誕敷深
仁普愛念官師所以卒歲恐天下有受其寒據秦軫窮當舒慮慘
況淒其戒序必惻然動心特以濱塞沍嚴持兵戰露句傳温詔緘
褚紋袍爛然畫鮮煦若春至矧部校什長賜各有差僻壘窮鄣悅
而忘苦振裾交扑聯襪相趨和氣暢肢顧折膠而何畏大恩壓已
憂稱服以為難有可仰酬不知輕殞

謝換龍閣表

宋祁

停直複門徒恩層閣本緣親而自乞蒙引籍以對除揆寵兼常無
顏容愧竊惟先聖有作叢構實與鬱律辰居之嚴褻積霧圖之廣
踵華創職稱是取材肇允榮塗何嘗輕授伏念臣識庸淺術學
庸孱入參玉堂間陪講殿徒以朴忠無飾孤耿自將附湜湜於涇
清守嚶嚶於雨晦賴天燾照曠日保全適以臣兄庠召自外藩復
參大政理所宜避地不處嫌稽首請閒素言敘懇丐上還於禁籍
得專侍於經帷伏蒙 尊號皇帝陛下見謂由衷特從換秩罷茲
要近處以清閒拂此礙之塵容應蟪蛄之寶宇伏況臣出入三歲
便蕃五遷四叨學士之名罕見從官之比雖素領焦禿病幹疔癩
器極斗筲之容利止鉛刀之割尚當勉懦為立續短裨長儻有補
於涓銖矢不忘於隕踣

謝加端明表

宋祁

乘塞無狀增秩蒙褒賜予侑頒心顏交斬伏念臣才弗振俗士偶
逢時備內朝臣十有六載學不足膺天子之問文無以代王者之

言遂圖外遷冀云少補惟定武一道契丹右廷咸平以來號勁兵處自夏竦分建四帥韓琦始領九州節制中軍部分諸將琦既進律臣實代居以一介懦儒當萬夫要任誼難辭劇奮靡顧愚然臣所習者藝文未曉者軍旅用非所習雖勤而弗效責於未曉故技有必窮用是再葺居無底績在法云殿惟黜是宜敢謂尊號皇帝陛下憫久戍之勞排彼譖之侈雖遠猶錄謂拙可矜收雲閣之故資著丹殿之新籍仍秩經省未易守藩叢沓徽章夸媵鄙邑重降嚴旨切卻讓封臣亦內揆愚心旁諗公議若循禮疊請則恐涉不誠或固節還恩又似規早罷不有寵使誰扞邊疆例格除音孰尊寵數輒昧涯分祇服器名日三省以自營身九殞而奚報但臣所念者邊務至重虜詐益滋得人失人繫守臣輕重知己知彼為天下安危而有司特用苛法相延守臣類以生事為解封候畏怯不敢搖手倉庫虛乏正可寒心建明累上而朝省未從姑息小虧則謗囂立至況臣衰晏素自瘞真判無成功徒忝休命望審擇於

豪俊俾臨統於方隅設張遠謀羈制驕狄因罄數於感臆竊附列於瞽言朔壘地卑君門天阻被符蠲謁攬綬知榮

代表陳州章相公乞致仕第一表

宋 祁

臣聞器有所極強之者必顛志有所安違之者將敗是故智士不窮量以邀受仁君無拂願以責功內顧危悚敢援茲喻伏念臣姿力駑下術略迂疎蒙幸中人之材待罪宰相之府寵與時進負隨日深謀謨弗良彫紊相踵羗夏有未纓之醜關陝多無聊之人萑盜跳梁篋酋煽結杼軸罄於編戶杆皮蠹於遠方上貽焦勞外謹謗誚咎不臣執罪將孰歸比者荐瀝肝膺願乞骸骨冀蒙不職之竄以贖安用之辜尊號皇帝陛下包納荒遐親喻戒勅須訖郊丘之享乃許印綬之還褒亮所加諄慈兼至臣此時外迫大誼中忘至愚敢優游以自安輒皇恐而視事然而智慮淺局年鬢頽侵短臂屈長袖之前疲足困新羈之左覩然尸位倏又彌年所賴陛下以百姓為心天下為度捨末爭而納戎帳之欵捐滯積以撫

遼社之和克展上儀遂布鴻慶永惟橫目之庶方就覆孟之安臣
之及茲可謂天幸過此不止其如罪何雖大度之見容在輿議之
難遏抑又聞當退而進者悔必及宜黜而用者傷必多高位乃身
殃之媒厚祿爲眾怨之舍借令臣冒厥明戒苟留上司玷廊廟之
儀形被史家之貶戮死有餘咎仁弗忍爲伏望察如丹之誠憐指
景之暮遂容納政早獲省私亦不必窮喋喋之言乃垂開可惜齷
齷之謹妨用俊良虔冀曰俞誓無但已

乞致仕表

張方平

竊以大君保息之慈人之老者疾者得所養治國經常之制仕之
進者退者惟其宜不堪陳力之勞爰上乞骸之請詔函下降天旨
未俞臣聞委質大方前經明訓自古不得謝者在禮雖或有之然
皆德業高賢功勳夙望邦家倚以爲重中外賴之爲安加恩所以
特優被寵誠爲無愧是以義全大體眾罔閒言如臣徒以空疎早
蒙簡擢事猷弗建報稱蔑施遽及衰疲遂求引罷而更濫當渥命

遙領真祠位陪執政之班祿倍大夫之秩職憂靡預官責不加上
紊彝章俯慙私倖敢循舊典謹復自陳伏惟 皇帝陛下下一氣均
私大圓丕冒匹夫自盡各伸所志之微萬物由庚皆受曲成之賜
俯諒虔勤之懇特垂開可之恩精驚紫宸猶結望雲之戀迹還白
社終懷樂聖之心

服闋謝復官表

孫沔

苴麻之服方爾外除綸綍之言驟然下及矧不移於舊序仍獲處
於近聯拜賜之深竊寵爲甚伏念臣出自單緒偶階盛時無近強
之依以進身惟清素之業以自立遴由宸眷升漸禁塗固常入備
諫員出分使委雖明目張膽內屢輸於忠言而竭力勉心外未揚
於民最旋以邊烽小警王師有爲朝廷擢以常僚假以煩使兵儲
之寄固已屢更邊帥之權亦嘗冒處厯踐數任甫逾七年轉漕非
能偶芻粟之充給招懷寡術幸部落之妥安以慈親之耄期益精
力之衰耗力陳愚素仰瀆宸聰懇辭益部之行適遂秦都之請故

雖嘗拜命曾未莅曹果家難之纏哀奉靈輿而歸葬偶全餘息以畢通喪生意茂然榮望已矣此蓋伏遇 皇帝陛下恢天地容蓋之德廣日月照臨之明以犬馬之勞曾屢膺於驅策而涓埃之益嘗有補於高深降中旨以召還俾參華於舊貫復援小銓之秩再躋延閣之榮敢不謹修吏方勤瘁王事昔焉為養尙當避危而就安今也卽孤自可以身而許國誓圖大效庶答鴻休

揚州謝上表

劉敞

一介之材善無所取千里之地任為不輕仰載恩華退增慙懼臣聞事上之行莫若愛君而愛君之臣莫重去國汲黯遺言李息望之致意本朝古今美談賢哲餘事況臣本以薄技邁茲昌辰幸得出入周衛之中優游侍從之末持橐簪筆庶乎寡尤帶劔佩衡足以自効豈其輕去嚴密之奉偷得便安之私蓋引嫌避親中外著令因事補吏朝廷通規幸蒙賜可之書殆殊共治之選伏遇 皇帝陛下天度容物聖資盡人揆其忠誠非有違象魏之意察其淺

識猶足寄民社之安沛然德音委以符竹敢不勤恤人隱奉宣上恩自飾固陋之心庶幾樂易之政

謝加學士表

劉敞

常人之情得所求而喜智者之慮過其任而憂今邊備雖嚴帥責差易學者雖眾儒選實難豈有貪就應聲之求忽忘非分之任忝松失據欣懼兼懷固欲辭榮未獲承命伏念臣猥以薄技起於諸生內之無子產潤色之才外之無山甫將明之用久典訓誥荐臨藩垣七年于茲微效不立猶以陪外廷之末聞長者之風聞蒙分章平議臣之奏時引大體正宗廟之儀苟圖納忠非敢迂物然而讒人飾詞以巧詆法吏挾怨以中傷當是之時幾無以免聖心先覺公議尙存浸潤之說不行震驚之眾為止風波可畏天幸實多內私自憐懼久得罪輒勾千里之守庶警一麾之行不謂 尊號皇帝陛下生成曲全覆露無已進預金華之講增重儒林之光委以西州適其素願望非所及幸不可涯夫匹夫一飯之恩庸士然

諾之信猶能捐生出死成功立名況臣連數十城之封兼四千石之重於以宣明威信撫養細民盡其愚忠庶免大悔以此圖報敢爲虛言

賀皇長子封公表

王拱辰

建親授社屏翰於王家封子維城安疆於國幹誕揚休命敷告羣倫均海寓之歡心洽朝廷之大慶竊以宗藩錫瑞賢戚分疆周列侯邦半諸姬而啟土漢有天下非劉氏則不王皆所以滋大本枝維持京室縣鼎數於穹壤固廟祏於山河屬我熙朝益隆茂典恭惟皇帝陛下纂承皇序恢闡洪圖善迪孫謀適遵祖構乃眷元良之重已昭岐嶷之英肇啟南圻崇加上袞離明震豫知帝緒之無疆海潤星暉戴吾君之有子臣居留近甸迹遠鬆墀側聽恩章舉增抃懌

永興謝上表

司馬光

荷恩至重任責尤深巡撫吏民敷宣詔令臣識慮闇淺規爲闊疎

唯知愚忠屢貢狂直奉事三世操守一心閒以齒髮浸衰疾疹交集會靡論思之効久污侍從之班既無補於本朝祈自高於散地不圖睿澤更委名都雖要重之權自知不稱而煩劇之地難以固辭受命以還措躬無所竭來就道甫爾到官維此咸秦昔爲畿甸山川清美土地膏腴論其平時誠爲樂土在於今日適值凶年經夏亢陽苗青乾而不秀涉秋淫雨穗黑腐而無收廩食一空家乏蓋藏之粟襁負相屬道有流離之人老弱懷溝壑之憂姦猾蓄菹蒲之志正宜安靜不可動搖譬諸烹魚勿煩擾則免糜爛如彼種木任生殖則自然蕃滋謹當策勵疲篤彫磨朽鈍智力所及勤瘁無辭雖復失位危身終不病民負國庶幾小補用答大恩

進資治通鑑表

司馬光

先奉勅編集歷代君臣事迹又奉聖旨賜名資治通鑑今已了畢者伏念臣性識愚魯學術荒疎凡百事爲皆出天下獨於前史粗嘗盡心自幼至老嗜之不厭每患遷固以來文字繁多自布衣之

士讀之不徧況於人主日有萬機何暇周覽臣嘗不自揆欲刪削冗長舉撮機要取關國家興衰繫生民休戚善可爲法惡可爲戒者爲編年一書使先後有倫精粗不雜私家力薄無由可成伏遇英宗皇帝資睿智之性敷文明之治思歷覽古事用恢張大猷爰詔下臣俾之編集臣夙昔所願一朝獲伸踊躍奉承惟懼不稱先帝仍命自選辟官屬於崇文院置局許借龍圖天章閣三館閣書祕籍賜以御府筆墨繪帛及御前錢以供果餌以內臣爲承受眷遇之榮近臣莫及不幸書未進御先帝違弃羣臣陛下雖頑愚荷兩朝知待如此其厚隕身喪元未足報塞苟智力所及豈敢有違會差知永興軍以衰疾不任治劇乞就冗官陛下俯從所欲曲賜容養差判西京留司御史臺及提舉嵩山崇福宮前後六任乃聽以書局自隨給之祿秩不責職業臣旣無他事得以研精極慮窮竭所有日力不足繼之以夜徧閱舊史旁採小說

簡牘盈積浩如煙海抉擿幽隱校計毫釐上起戰國下終五代凡一千三百六十二年修成二百九十四卷又略舉事目年經國緯以備檢尋爲目錄三十卷又參考羣書評其同異俾歸一塗爲考異三十卷合三百五十四卷自治平開局迨今始成歲月淹久其間抵牾不敢自保罪負之重固無所逃重念臣違離闕庭十有五年雖身處于外區區之心朝夕寤寐何嘗不在陛下左右顧以驚蹇無施而可是以專事鉛槧用酬大恩庶竭涓塵少裨海岳臣今筋骸癯瘁目視昏近齒牙無幾神識衰耗目前所爲旋踵遺忘臣之精力盡於此書伏望陛下寬其妄作之誅察其願忠之意以清閒之燕時賜省覽監前世之興衰考當今之得失嘉善矜惡取是捨非足以懋稽古之盛德躋無前之至治俾四海羣生咸蒙其福則臣雖委骨九泉志願永畢矣謹奉表陳進以聞

新州謝上表

呂誨

三諫則逃敢嚙大節一麾出守誠自寬恩舉族均榮畢身知愧伏

念臣戇冥所賦忠朴是存篤於愛君惟知盡道向議稱親之禮屢形繼統之言豈期佐佑之臣首違經義遂啟異同之論上感宸聰暨頒慈壽之手書仍用定陶之故事朋姦之眾蓋希宏博之要榮致主之謀不恥哀桓之亂制業雖已具理有未安臣忝備憲司正當言責既不能排斥邪佞將何以振肅紀綱心匪石以徒堅力迴天而莫得容身曠職公議何逃拒詔去官萬死寧贖而賴陛下至明委照全度兼容屬當求治之初務廣納忠之益言雖忤旨察其所嚮之誠罪不主名施以惟輕之典授符淮甸畫壤江壻魚稻之饒寔惟紓緩民社之重獲展勤勞天幸叢來國恩彌渥退思補過愈精夙夜之虔知無不為更勵始終之節仰酬洪造誓竭顛愚

奏乞致仕表

呂誨

臣輒罄愚誠上千宸慈伏况微臣本無宿疾偶值醫者用術乖方殊不知脉候有虛實陰陽有逆順診察有標本治療有先後妄投湯藥率任情意差之指下禍延四肢寢成風痺遂難行步非祇憚灸鑿之苦又將虞心腹之變勢已及此為之奈何雖然一身之微固未足卹其如九族之託良以為憂是思逃祿以偷生不俟引年而還政顧惟素志幾負明時力既不足誠豈得已况恃睿監夙謀孤忠進非左右之容退知榮辱之分與之全節示以曲成臣不避再煩天聽欲乞致仕仍不願改官早賜開可臣無任顛天懇激之至

潭州通判謝上表

唐介

始竄嶺南人皆謂之必死及遷湖外恩寔出於再生仍復前官俾關郡政仰叨成命增激微衷切念臣寒素立身孤直無援歷官再紀才貳郎曹入朝踰年幸兼風憲臣自以逢聖明之治當言責之司祇知忠義以事君不顧患禍之及已凡所上奏必盡至公流輩為臣寒心姦邪見臣切齒臣本欲為耳目於陛下勉副簡求不能效鷹犬於他人以希進用心雖無媿迹已甚孤屬權臣之擅朝肆已私而害政輒輸忠款冀補涓塵陛對之聞未能悉意天威之

下卒莫自明得罪一時竄身萬里流離遠道殆及暮年擯奔遐荒
分甘散秩豈謂 皇帝陛下存國大體察臣愚忠欲招諫者之言
免為後來之誠三推皇澤特與一官以邕廣之寇攘擇湖湘之守
倅俾從征筦得佐郡符然臣粗識義方薄知臣節納忠獲罪願百
謫以誠甘盡瘁報君雖九死而不悔謹當益勤官守以助軍興夙
夜以思冀免於敗事毫分有補少答於大恩

賀冊皇妃表

王安石

禮盛之禮發於宮闈驩康之聲播於寰海伏惟 陛下考古之憲
刑家以身乃資婦德之良俾貳坤儀之政蓋關雎之求淑女以無
險詖私謁之心雞鳴之得賢妃則有儆戒相成之道於以助治不
專為恩臣生逢明時切觀盛事祝聖人之多子輒慕堯封思令德
以式歌豈慙周雅

賀生皇子表

王安石

嘉慶係傳歡欣總集臣歷觀古昔誕受福祥厥配天所以久長乃
有子至於千億伏惟 皇帝陛下鳧鷖之雅媚于神祇芣苢之風
燕及黎庶弓韜嗣燕禩之報旒纛仍罷夢之祥無疆惟休永保桑
苞之固有室大競方觀椒實之繁臣嘗汗近司久尸榮祿特荷殊
憐之至豈勝竊喜之深

又表

王安石

皇運邳隆天枝彌茂照臨所暨鼓舞攸均臣聞史紀文慶之延豈
惟十子詩歌似徽之繼爰至百男肇敏於修乃繁厥祉恭惟 皇
帝陛下道冒區宇德冠往初品庶蒙休既饗和平之樂神靈錫羨
果膺蕃衍之祥臣嘗汗近司備叨殊獎以宿痾而自困欲旅進以
無階

又表

王安石

社扶宗祏慶襲宮闈凡預照臨惟胥鼓舞臣聞有秩秩幽幽之德
所以考室而見祥有誥誥揖揖之風所以宜家而多子克參盛美
允屬昌時伏惟 皇帝陛下膺命上天紹休烈祖本支方茂用光

世德之求功業能昭永賴孫謀之燕通追來孝申錫無疆臣久玷
恩私外叨屬任四方來賀望雙闕以無階萬福攸同撫微軀而有
賴

又表

王安石

宮闈嗣慶寰海交欣凡逮戴天惟均擊壤臣聞螽斯之言眾子是
爲王者之詩華封之祝多男亦曰聖人之事恭惟 皇帝陛下紹
祖休顯憲天昭明致文武之憂勤成堯舜之仁孝宅師無競莞簞
之寢旣安傳類有祥弓鞬之祠屢應詒謀方永錫羨用光臣託備
藩維叨承睿獎不顯亦世家實預於榮懷於萬斯年心敢忘於慶
賴

漳州進珠表

王冕

宋大中祥符六年春冕自廬陵移典是郡越明年三月龍溪屬邑
民邱顯於九龍溪網魚得珠一顆圍闊三寸七分中有小珠七顆
如七曜次如七曜者不可勝數縣弗敢留條珠之始于郡冕熟而

視之殊大歡抃即日召厥屬官以驗之復相稱慶曰夫珠至寶也
王者德至淵泉則出今 天子仁且聖方以寬慈被天下宜乎珠
之出獎 聖世又珠之爲物也其色瑩淨明清乃化民之象也於
是列表以進尋奉 勅書以旌至寶冕旣叨爲政能獲斯寶又懼
是事泯絕於後刊之貞石于公廳之左用傳于永永耳臣冕言臣
聞皇猷允塞天乃效祥聖德升聞地不藏寶前件珠得非蛇口產
異蚌胎有感必通生自煙潭之內無脛而至忽居寶肆之中熒煌
外散於月華皎潔內含於星彩此蓋 皇帝陛下齋莊奉道清淨
化民體乾極以握符致坤靈而薦瑞遐稽信史迴殊照乘之光洞
究祥經弗類媚川之色臣握蘭郎署剖竹侯封幸逢江海之珍難
藏外郡願繼梯航之貢干黷內廷臣無任瞻天戀 聖激切屏營
之至

宋文鑑卷第六十五

宋文鑑卷第六十六

表

謝知制誥表

江寧府謝上表

謝翰林學士表

謝賜對衣鞍馬表

謝賜弟安國及第表

進修南郊式表

謝男雱除中允說書表

乞御正殿復常膳表

第二表

謝東府賜御筵表

乞罷政事表

乞退表

王安石

王安石

王安石

王安石

王安石

王安石

王安石

王安石

王安石

王安石

王安石

王安石

第二表

賀周德妃及魏國大長公主禮成表

王安石

賀冬表

王安石

乞宮觀表

王安石

賀赦表

王安石

賀正表

王安石

謝朱炎傳旨令視事表

王安石

謝加南郊恩表

王安石

賀景靈宮奉安列聖御容表

王安石

賀南郊禮畢表

王安石

辭南郊陪位表

王安石

謝免南郊陪位表

王安石

辭明堂陪位表

王安石

謝加食邑表

王安石

廣德軍謝上表

謝知制誥表

錢公輔

王安石

高華之選欲報嘗艱固陋之身以榮為懼竊以自古招智能之士
 固使為侍從之臣豈特賴其虛名謂能華國蓋將收其實用相與
 致君矧號令文章之為難而討論潤色之所寄苟失職不稱則為
 時起羞伏惟 皇帝陛下躬上聖之資撫久安之運趨時有救弊
 之急守器有持盈之難當得俊良使陪遺忘則典司明命出入禁
 門一有瘵官尤為累上臣羈單賤士鄙朴常人仕初有志於養親
 學遂不專於為己比更煩使稍竊謬恩內懷尸祿之慙仰負食功
 之意又蒙採擢以至超踰蓋君之視臣不使同犬馬之賤則下之
 報上亦欲致岡陵之崇況臣少習藝文粗知名教遭逢一旦度越
 眾人唯當盡節於明時豈敢止懷於私計

江寧府謝上表

王安石

稽違詔令經涉歲時

先帝登遐既不獲奔馳道路

陛下即位

又未嘗瞻望闕廷所憂後至之刑誅敢冀就加於官使雖知黽勉
尚懼顛隳蓋聞因任以責羣材厚省以通眾志厥或抱能而可用
則雖負疾而見容如臣者逮侍先朝叨官外制倦倦許國雖有
愚忠役役隨人但尸榮祿銜哀去位嬰疾彌年望絕龍光分投冗
散伏遇皇帝陛下紹膺尊極俯燭幽微延之以三節之嚴付之
以十城之重比緣禋祀特有褒封申命曲加因郵併賜唯是土風
之美素無狂獄之煩久寄託於邱墳粗諳知其閭里念雖閉閣殆
弗廢於承流以比造朝或未妨於養疾矧恩勤之已迫且遜避之
不容敢不少嘗體力之所任祇奉詔條而為治冀逃大戾仰稱殊
私

謝翰林學士表

王安石

臣聞人臣之事主患在不知學術而居寵有冒昧之心人主之畜
臣患在不察名實而聽言無惻怛之意此有天下國家者所以難
於任使而有道德者亦所以難於進取也學士職親地要而以討

論諷議為官非夫遠足以知先王近足以見當世忠厚篤實廉恥
之操足以咨諏而不疑草創潤色文章之才足以付託而無負則
在此位為無以稱如臣不肖涉道未優初無犖犖過人之才徒有
區區自守之善以至將順建明之大體則或疎闊淺陋而不知加
以憂傷疾病久弃里閭辭命之習燕廢積年黽勉一州已為忝冒
禁林之選豈所堪任伏惟皇帝陛下躬聖德承聖緒於羣臣賢
否已知考慎而於其言也又能虛己以聽之故聰明睿智神武之
實已見於行事日月未久而天下翹首企踵以望唐虞成周之太
平臣於此時實被收召所以許國義當如何敢不磨礪淬濯已衰
之心紬繹溫尋久廢之學上以備顧問之所及下以供職司之所
守

謝賜對衣鞍馬表

王安石

出大庭之顯服束以精鏐引內廐之名駒傳之錯采隆恩所逮朽
質知榮竊念臣弱力淺聞久憂積疢中預從官之選外分守將之

權僅免譴訶更蒙收召論思潤色曾莫效於微勞衣被服乘乃前
叨於異數此蓋伏遇 皇帝陛下醴於慶賞詳在招延因示眷懷
使知奮勵誓竭愚忠之報冀無虛授之嫌

謝賜弟安國及第表

王安石

雋乂之求外覃草野龍光之施首逮門庭竊以躬國論聽斷之煩
而察知孤遠之行略門資貢舉之法而拔取滯淹之才山林之所
誦說而難遭閭巷之所驚嗟而罕見伏惟 皇帝陛下協德穹昊
比明義和博臨四方洞照萬物如臣同產爲世畸人少遭閔凶自
奮寒苦雖學力行誼粗有時名而少偶寡徒幾絕榮望豈期 聖聽
俯及幽潛遂使窮途坐陞華寵獎以詔書而試藝賜之科第而命
官祿不逮親既永乖於養志仕非爲己當其誓於捐軀

進修南郊式表

王安石

郊丘事重筆削才難猥以微能叨承遴選蓋聞孝以配天爲大聖
以享帝爲能越我百年之休明因時五代之流弊前期戒具人輒
爲之騷然臨祭視成事或幾乎率爾蓋已行之品式曾莫紀於官
司故國家講燎禋之上儀而臣等承撰次之明詔迨茲彌歲僅乃
終篇猶因用於故常特刪除其紛冗恭惟 皇帝陛下體聖神之
質志文武之功嘉與俊髦靈承穹昊物方鬯茂以薦信而無慙人
具昭明知因陋之爲恥固將制禮作樂以復周唐之舊豈終循誦
習傳而守秦漢之餘則斯書也譬大輅之椎輪與明堂之營室推
本知變實有考於將來隨時施宜亦不爲乎無補

謝男秀除中允說書表

王安石

恩驟加於私室多所超踰事或累於公朝誠難冒昧仰煩睿訓曲
喻至懷永惟眷獎之殊實重兢慙之至伏念臣首叨召節得侍辭
林隨被贊書使陪經幄稍更歲月莫補涓埃竊觀上智之日躋內
訟淺聞而知困况如賤息厥有童心尙迷鑽仰之方豈稱招延之
禮恕已量主非敢以私而自嫌爲官擇人顧雖成命而宜改輒布
可辭之義上干難犯之威伏惟 皇帝陛下屈體優容垂精寵答

謂大人照臨之道廣當養以蒙意小夫誦說之智專遽忘其賤褒稱備厚訓飭加嚴揣實未安寄顏有惡重念自古君臣之相與未有如臣父子之所遭蓋當用儒之時尤難講藝之職典謨方御實參備於討論誥誓未終已繼叨於獎擢獲世官於閭巷嗣家學於朝廷自非忘軀何以報國知人而官以哲慨已獲於明揚委質而教之忠誓永肩於素守

乞 皇帝御正殿復常膳表

王安石

陽春生物偶霑澤之稍愆睿意恤民遽側身而自抑德已修於消變數或係於非常當服彝儀用安羣下恭惟 皇帝陛下天仁博施神知曲成躬忘旰食之勞坐講日新之政四時協序萬物致和適當化養之辰宜得涵濡之澤少違常候深軫清衷退師氏之正朝約太官之盛饌仰窺謙德志在閔民然而遐虜來朝當卽法宮之位誕辰入慶合陳燕俎之珍事有所先禮難偏廢伏願仰回淵聽俯徇輿情夙御九筵之居並羞十閣之具上以全於國體下以

副於臣誠

第二表

王安石

時澤偶愆屢勤齋禱聖衷愈勵曲盡焦勞將損己以召休因退次而貶食列陳劾奏尙闕嗣音在臣列之靡遑伏帝闈而再扣恭惟 皇帝陛下體居離正德稟乾剛期揉俗以致康嘗納隍而興念七載于此繼獲豐穰一春而來或罹愆亢皇慈深軫羣祀徧修恐狴犴乖則親慮其囚懼黼黻美則躬變其服仍損內饗之舉兼虛正宁之朝然而禮貴從宜事難泥古而況甫臨誕節交舉慶儀有列辟拜萬年之觴有殊俗修兩朝之好苟虧彝制難副羣情伏望少屈淵衷特從誠懇天臨廣廈日御常珍親事法宮廓宣於政治惟辟玉食昭示於等威仰以慰兩宮之慈俯以安羣下之望

謝東府賜御筵表

王安石

恩厚不貲誠先賢之務稱頑冥無似欲報國而知難臣等過以凡材並膺殊選久壅賢路上孤聖時伏惟 陛下謀德在容求仁以

怨謂大臣方宣勞於王室則人主當加恤其私家發使禁闈之中
視圖魏闕之下取才置臬皆斷於眷謀成事告功不煩於宰旅重
紆衡蓋周視庭除申以中人喻之良月使及日辰之吉卽于堂寢
之安輟車府之傍牽載其帑重移饗官之烹割侑以鼓歌歡更逮
於邇臣寵先加於小已陰陽或謬未知燮理之方風雨其除徒賴
餅幪之賜

乞罷政事表

王安石

私懷懇至已具布聞聖訓丁寧未蒙開納敢冒崇高之聽再輸惻
悞之情臣聞任賢之方要其有用陳力之義止於不能苟弗集於
事功且重罹於疾疾豈容叨據以累明揚伏念臣猥以孤生親逢
盛世昧於量已志欲補於休明失在信書事浸成於迂闊每煩眾
論上恩聖聰久知素願之難諧繼以積痾而自困辭而去位庶逃
竊食之誅勉以就功重荷包荒之德雖貪順命終懼妨功伏惟
皇帝陛下閔度并容大明俯燭特垂矜允俾遂退藏如此則孤進

之身獲全生於末路具瞻之地得改命於時材

乞退表

王安石

臣忠於爲國故進而能致其君恕以及人故病則閔勞以事此今
昔共由之通義實上下相與之至情敢觸冒昧之誅冀蒙哀矜之
聽臣受才鄙劣遭運休明陳愚或會於聖心承乏遂尸於宰事謀
謨淺拙謾不見其有成操行陵夷又或幾於無恥久宜辭位尙苟
貪恩豈圖養拙以乖方重以瞽昏而廢務粗嘗陳列未獲矜從黽
勉以來浸淫遂劇大懼典司之曠上煩程督之嚴伏惟陛下詢
事考言循名責實或輟夜分之寐常臨日昃之朝萬方黎獻之多
各皆祗辟三事大夫之守豈可瘵官仰冀高明俯昭惻悞念其服
勞之久愍其搜瘵之深及未干鉄鉞之時令遂解機衡之任豈特
少安於私義茲惟畢協於師虞

第二表

王安石

聖恩所及有隆天重地之施私義未安有深淵薄冰之懼竊惟成

湯高宗之世有若伊尹傅說之臣其道則格于帝而無疑其政則加乎民而有徧后惟時又相亦有終迨乎中世之陵夷非復古人之髣髴忠或不足以取信而事事至於自明義或不足以勝姦而人人與之爲敵以此乘權而久處孰能持祿以少安此臣之慮危於居寵之時而昧死有均勞之乞況於抱病浸以瘵官伏惟陛下道與日躋德侔乾覆哀一夫之失所樂萬物之皆昌矧夫眷遇之優卽已勤劬之久宜蒙善貸使善曲全賜其疲賤之身假以安閑之地則敝車無用猶可具於勞薪棄席未忘或再施於華幄

賀周德妃及魏國大長公主禮成表

王安石

明告治庭寵頒恩冊家邦之慶海宇以欣恭惟

皇帝陛下荷天

闕休若古丕式自禰率而尊祖備極靈承謂姊親而先姑特加徽數改錫厥壤增褒所生大號已孚庶言惟允臣久尸榮祿竊睹盛儀臚傳雖異於九賓率舞尙同於百獸

賀冬表

王安石

陰借物極陽與朋來推歷玩占乃見潛萌之信體元御辨以知敦復之中恭惟 皇帝陛下舜孝禹功文謨武烈茂對時之福嘏靈承旅以壽康臣久冒朝榮外叨方任弗預稱觴之末豈勝存闕之深

乞宮觀表

王安石

筋骸衰薊僅有餘生肝膈精微簡在聖聽豈圖寵獎未賜矜從輒冒威尊更輸情素伏念臣久妨機要初乏涓塵苟免庶尤實荷恩私之至敢緣多疾更尸名器之崇比辱使軺俯宣詔旨深惟策勵仰稱龍光而況病瘵有加療治無損辭榮家食乃爲理分之宜干澤自營尙恃眷憐之舊伏惟 皇帝陛下衡聽萬事器使眾材念其黽勉之終難假以便安而少愒庶完體力圖報毫分

賀赦表

王安石

精意上昭神靈底豫茂恩旁暢夷夏接和臣聞道以饗帝爲難禮以配天爲至有秩斯祐唯四表之歡心胡臭亶時匪九州之美味

自古在昔若聖與仁厥遭昌辰乃觀熙事恭惟 皇帝陛下邁種
三德敷奏九功率籲奉璋之眾髦舉稱奠璧之新禮廟邊致孝郊
血告幽誠既格於穹昊福遂均於品庶振憂矜寡原宥眚戕第五
玉以褒封善人是富發三錢而慶賜賤者不虛天其居歆人以呼
舞臣夙叨寵獎親值休成雖無預於駿奔實不勝於竊抃

賀正表

王安石

寶歷無疆嘉生有俶門憲始和之象庭充元會之儀伏惟 皇帝
陛下膺保永圖茂綏純嘏撫五辰而致順毓萬物以皆昌臣久負
異恩尚撓衰疾瞻雲煥爛欣逢舜旦之華擊壤逍遙樂得夏時之
正

謝朱炎傳聖旨令視事表

王安石

使指遄臻訓詞俯逮敢圖衰疾尚悞眷存伏念臣曲荷搜揚久孤
付屬有能必獻未嘗擇事而辭難無力可陳乃始籲天而求佚然
方焦思有爲之日以此懷恩未報之身苟營燕安豈免慙悻伏蒙

陛下人惟求舊義不忘遐乃因乘輅賦命之臣更喻推轂授方
之意踦履無用誠弗忍於弃捐朽株匪材尚奚勝於器使永惟獎
勵徒誓糜捐

謝加南郊恩表

王安石

解澤旁流明綸俯被永惟叨昧深以兢榮竊以時郊丘之承所以
尊上帝疇官邑之賜所以富善人盛福靡專至恩惟稱臣久塵要
近上累昭明方玉輅之親祠以銅符而外守逮均休慶例獲褒嘉
此蓋伏遇 皇帝陛下以平施於萬方無遐遺之一物矧蒙圖任
之舊特荷獎知之深祇服訓辭敢忘報禮

賀景靈宮奉安列聖御容表

王安石

新一代之上儀極二端之美報經始有俶實自睿謀歡成無疆乃
惟眾志竊以闕宮鬼享周特腆於姜嫄原廟神游漢獨隆於高帝
遠或遺祖近止及親恭惟 皇帝陛下服卑而即功食菲以致孝
嚴祖宗之眾像依仙釋而異宮館御因時初豈忘於苟簡修除備

物乃有待於純熙宸宇秘嚴扁榜崇麗裸獻式序妥侑維時藐然
往初孰此倫擬臣久尸榮祿尚負宿痾聞釐事之既成與羣情而
借樂

賀南郊禮畢表

王安石

精明條達神睠顧而依懷膏澤川流人歡呼而蹈厲臣聞語孝之
至莫大於配天議禮而輕不足以享帝能舉釐事實歸聖時恭惟
皇帝陛下鴻化已昭康年屢應奔走遵豆有董正之治官潔豐
粢盛有底慎之財賦禮成穀且恩浹緜區雖洛誦之休明尚難譬
稱豈兒寬之淺訥能盡掄揚臣夙荷慈憐方搜衰瘵望九賓之紳
笏獨遠句傳狎百獸於山林猶知率舞

辭南郊陪位表

王安石

萬國駿奔煒上義之殊觀一夫幽屏叨明命之特招伏念臣竊祿
已多冒恩最渥自致倦倦之義實有素情再瞻穆穆之容豈非榮
願而繭然暮景攬以沉痾伏吠畝以負薪於今未已侍壇垓而踐

豆用此爲妨

謝免南郊陪位表

王安石

螻蟻倦倦上干旒展雲天顛顛俯賈邱園臣憊矣微生頽然暮齒
冒恩鼎食非堅臥以爲高承命旌招宜駿奔而反後顧緣衰繭致
隔清光伏蒙 陛下特赦尤違曲垂念聽菴昏難望尚延舜日之
華荒翳易遺更獲堯雲之潤

辭明堂陪位表

王安石

合宮丕享寰宇駿奔冒被優詔之加使陪顯相之末伏念臣投身
荒遠上負眷憐企踵禁嚴久勞鑿寐况宗祈之盛禮辱號召之明
恩當卽辦嚴豈容辭疾而沈寘浸劇黽勉實難心若子牟雖每存
於魏闕身如楊僕乃自外於漢關

謝加食邑表

王安石

顯相郊宮固宜寵獎曠居田里乃濫褒加伏念臣尚負宿痾久尸
榮祿無可論之薄效有未報之隆恩萬國明禋庶工祗載奉璋執

豆旅幣獻琛具輸奔走之勞獨抱滯留之歎豈圖疎逖亦冒寵光
此蓋 皇帝陛下荷休駿龐斂福敷錫故雖幽屏弗以遐遺身每
被於慈憐心敢忘於勤策

廣德軍謝上表

錢公輔

曠官罪大奪位秩者彌年享帝恩隆回雷霆於數日籍還省部身
忝軍牙祗荷寵靈伏深感懼伏念臣江湖賤士巖穴孤生出逢聖
辰升備法從學非深造粗能明致治之方心不苟容姑欲罄事君
之節義當有在雖富貴誘之而不回職所宜言雖斧鉞威之而益
厲果由官守遂正典刑放之窮山所以苦其心志授之散秩將以
餓其體膚期沒齒於蒿萊敢希榮於軒冕豈圖寬宥尙被采收死
灰誰謂乎復然白骨安知乎再肉便鄉守壘上冢還家百計安閑
一身妥逸使其自請未必能然此蓋伏遇 陛下化極文明恩漸
動植如天之覆遠則彌周如日之中幽無不燭遂容鴛質猥玷鴻
私況是桐川獨居江左俗雖僻陋而稱風物之良地雖褊迫而有

山林之勝養茲不肖孰曰匪宜惟修省所以飭躬惟忠勤所以報
國有民有社固恪奉於訓詞爲子爲臣方益堅於素節誓殫犬馬
仰答龍光

宋文鑑卷第六十六

宋文鑑卷第六十七

謝南郊加恩表
 請 皇帝罷謁太廟表
 謝賜生日生餼表
 謝賜生日禮物表
 越州謝上表
 越州謝上表
 謝致仕表
 定州謝上表
 河陽謝上表
 賀熙寧十年南郊禮畢大赦表
 謝元豐元年曆日表
 謝翰林侍讀學士表

王珪
 王珪
 王珪
 王文通
 元絳
 元絳
 呂公著
 馮京
 會鞏
 會鞏
 范鎮

謝致仕表

謝龍圖閣直學士表

安州謝上表

謝澶州簽判表

代謝進和御詩獎諭表

代都運趙待制謝上表

代謝再任表

謝南郊加恩表

奉二精之報方錯事於崇邱獵三靈之流遂均釐於邇輔仰承嘉命俯惕孤衷伏念臣蚤會昌期進聞國論器雖狹於所用志常勇於有為屬修郊廟之祠叨與公卿之議鳴鐘在簾獲際靈旂之娛紆佩埽塗親承天步之恪曾乏秉文之助得觀繼聖之能逮敷錫於鴻休復過膺於寵數論非朝允恩實天隆茲蓋伏遇 皇帝陛下文輯闊希仁漸疏迹因神推惠既被蟲魚之豐為己掠功何勝

范鎮

宋敏求

滕甫

程顥

強至

強至

王珪

淵谷之畏尚勉殫於樸守期少謝於曲成

請 皇帝罷謁太廟表

王珪

近嘗拜章以大慶殿將行恭謝天地之禮乞罷前一日謁太廟者伏以升燎于壇卽節徂郊之禮奉璋于室宜財假廟之文俞音未回羣聽猶鬱恭惟 尊號皇帝陛下膺純耀之烈撫休明之期蓋神勞萬務則氣或整和以德交三靈則福亦旋感念保綏於鴻業思昭謝于高穹迺涓路寢之居以象圓丘之饗粢盛芳潔璧玉華光方將陟配三后之靈導迎上帝之貺茲誠為人子者孝之盡有天下者報之隆今復馳齊蹕之嚴祇太室之薦竊恐霧露之氣涉于宵衣輿馬之音震乎天步則非所以承 祖宗之受來邦家之休臣等冒秉化鈞獲司熙典謂文之所損在于適時之變且事不敢勉誠以愛君之深冀不並侑之虔願弭先期之謁儻乎眾欲是契天心

謝賜生日禮物生餼表

王珪

詔函俯暨臺饋申頌絕衡弼之異恩動里閭之殊觀伏念臣所懷
蹇淺自奮羈單方少而孤每感劬勞之日其生也幸得遭熙盛之
朝遂以區區投老之身而處赫赫具瞻之地與圖邦政固無經遠
之謀式燕私門更誤養賢之禮此蓋伏遇 皇帝陛下寵綏近辟
不冒庶工謂君臣同體則憂樂宜均而上下相求則報施爲重幣
增實寵已厚於解衣餼稟盈庭愧有加於淨食敢不內竭朴愚
之守上酬獎顧之深

謝賜生日禮物表

王珪

聖言如綉有溫厚於芝函邦錫自天發光華於葭室榮諭素望媿
溢常涯伏念臣以固陋之資被睿神之眷迺預塵於政路復冠列
於台司歲月崢嶸而屢更精力勤勞而莫補速譏議於眾口愧功
烈於前人逮茲苟完安有橫冀載及桑蓬之序方深帖記之思念
莫報於劬勞敢鑿承於恩禮良金燭乘嚴寶勒於天駒藻帛絢文
雜華章於笥服豈繁蕃庶併及衰遲此蓋伏遇 皇帝陛下敦舜

孝以儀民軫堯仁而冒物特厚柄臣之遇過頒御府之珍交乎曲
記於賤生博愛乃容於濫賜拜漢庭之寵雖慙稽古之工報周雅
之章願上如岡之壽

越州謝上表

沈文通

以親爲請得郡甚優越去宮庭介居江海就職之始撫心弗寧伏
念臣本諸生知守前緒親逢文治之盛冒塵科選之榮擢躋儒林
遂執史筆學不足以達治亂於顧問實難文不能以通古今於述
作何有誤出 聖朝之遇進登侍從之途黽勉備官逡巡待罪雖
大恩未報豈敢便安其身顧私養弗充不勝進退之迫輒以誠乞
就茲奠居幸溢於涯感無以喻此蓋伏遇 尊號皇帝陛下天地
之德覆載而無所不容日月之明照臨而無所不暨故臣得遂其
犬馬之志安于藩翰之閒况茲爲州自昔建國連帶數郡之廣總
齊萬兵之權有可以爲當無所苟尙寬東顧之慮少獲萬分之心

越州謝上表

元絳

易帥嶠南方深危懼分符浙右特荷保全仰服恩章惟知感涕伏
念臣習知忠誼竊慕功名歷事三朝行將四紀向自北垂之漕
就更南粵之麾蒙臨遣以丁寧敢違安而留滯載驅長陸甫及半
塗忽聞羽檄之音謂有龍編之警橫水明光之甲得自虛聲雲中
赤白之囊倡爲危事邊萌擾動朝聽震驚況在乎守臣敢愆奔命
風馳南海已久見於吏民日遠長安蓋未聞於章奏仰煩宵旰咨
及臣鄰謂護塞之急人且擇才而代戍驅車萬里虛出玉關之門
乘駟一麾幸至會稽之邸尙兼方面彌畏人言此蓋伏遇陛下
法道曲全等天不冒以臣更事絲久備歷四方之勤知臣立朝最
孤迥無一介之助渙然休命付畀价藩臣敢不訓旅以嚴安民以
靜庶希樂易之治仰補熙隆之時銜賜不貲論生曷補

謝致仕表

元絳

四載披誠靳還於朝組九重垂聽申錫於詔函預儲宮之備官遂
家林之佚老伏念臣衣纓衰緒樛櫟下材再亂而孤僅能構思未

冠而仕始務代耕惜儒術之逢原狃吏文之宿業歷官三世服勞
四方蒙上聖之誤知自東州而卽召擢賓詞禁進處冬官浸膺選
眾之求竊貳贊元之任近藩出守遇潛邸之建旄別殿追還復露
門之奉席遽周歲律屢對威顏自惟癯朽之餘每循止足之戒深
辭圭紱冀就田廬載齒孤鳴空懷疲戀槁骸如在正欲全歸仰煩
睿訓之慈終竊愚衷之守不圖寵眷加進榮階存東宮保養之官
仍西清嚴近之職效華封之祝子付見多男階商皓之通賓願護
太子恩隆山岳感浹肺肝此蓋伏遇皇帝陛下大道曲全至仁
博施念師丹之垂老久已宣勤察衛綰之無他居常遠恥越推渥
渙獲保初終詭里俗而有輝顧師言而至愧冥鴻雖遠正依天寓
之函容時藿未彫尙素日華之明潤逢辰知幸之死不忘

定州謝上表

呂公著

尸榮右府無裨廟算之奇假守中山復當閭制之重戴恩爲懼虔
命以行遄屆郡封恪宣條詔伏念臣降才謏薄植性懦愚學術不

足以稽五謀之疑識慮不足以籌千里之勝特以百年舊族荷累
聖不賞之恩一介微軀辱上主非常之遇寅緣寵渥更踐清華晚
收疎外之孤蹤擢贊微幾之要務奉天光而咫尺被聖誨之丁寧
謂臣出服近僚有均休共戚之義察臣傍無厚援絕背公死黨之
嫌曲示優容俾思報效顧鴛鉛之難強嗟蒲柳之易衰久預枋司
積有妨賢之畏海祈麾寄更圖陳力之方伏遇 皇帝陛下體虛
靜以儲神極高明而盡下俯矜素悃特霑俞音惟定武之奧區據
朔陲之重地尙叨付委靡卽弃捐仍進敘於文階且兼華於秘殿
併將厚意增賁舊臣况臣夙侍軒墀實司樞筦凡治軍經武之要
洎守塞禦戎之宜日炙睿謀備觀宸斷逮茲臨遣得以遵承謹當
細大必躬夙宵彌勵進不敢希功而生事退不敢弛備以曠官期
不玷於誤知庶少酬於鴻施

河陽謝上表

馮京

久塵右地無補聖明坐竊邇藩尙寬罪戾恩私溢望愧灼兼懷伏

念臣才不逮中智非經遠特逢盛際再列近司擢之於尋常之中
振之於顛危之下便蕃異數究極寵光齷齪備員僅能寡過碌碌
成事無足論功徒肩許國之誠靡講衛生之術曩嬰疾疹殆至膏
肓雖賴上醫迄存餘喘然而氣血潛耗智慮早衰筋力乏於步趨
耳目乖於聽覽勉從職事仍歷歲時覆餗之譏已騰眾口乞麾之
請遽惻上心矧惟右輔名都三城重鎮水陸皆便次舍非遙食物
具宜堂皇尤峻使傳罕經於館候訟牒希至於庭除加以時雨旣
優宿麥滋茂盜賊屏息閭里阜安不煩施爲有便頤養此蓋伏遇
皇帝陛下天地容覆日月照臨私臣以不報之恩諒臣有可矜
之理終始眷遇進退保全顧何心顏敢愛軀命惟願稍加藥餌益
近方書朝露未晞儻復還於舊觀燭火不息誓更竭於精神

賀熙寧十年南郊禮畢大赦表

曾鞏

人之所歸者莫如德天之所享者在於誠其惟聖王克有全美伏
惟 皇帝陛下聰明稽古承繼祖宗慈惠愛人撫臨邦國有徧覆

并容之大度有防微慎獨之小心不從遊畋不近聲色無紛華盛麗之好無便僻側媚之私歲時吉蠲以承七廟左右順適以奉兩宮其功施於人效見於事則宅仁由義縉紳之徒成材於學校超距蹋鞠熊羆之旅養勇於營屯甌窶汚邪之收充於倉廩關石和鈞之利阜於市廛家有豫樂之聲人無愁怨之色協氣所召休應自殊鈞陳太微星緯咸若崑崙渤濤波不驚近則金石之音鳥獸欣躍遠則干羽之舞蠻夷駁奔象齒旅於闕庭龍媒納於閑廐是謂六府三事皆可以歌四海九州罔不率俾蓋巍巍而特起非瑣瑣之能闕前世議太山之封謀梁甫之禪者度崇比大疇克登茲 陛下抑而不圖謙以自牧以謂先后創業垂統其功莫得而名上帝隕祉發祥其德無可以稱思所以報一本於心故寅畏嚴恭積之有素而齊明薰祓進而益虔在於物者不取其煩盡諸已者必求其實是以蕭光之烈奏於宗祊柴燎之蒸焜於郊兆幽隱昭答神靈顧懷無疆惟休方浸昌於萬世不敢專享故敷錫於羣

元參稽典彝定著赦令弛張從理同異稱情蠲罪眚而棄瑕疵錄勞能而縱逋負顯晦咸暨洪纖不遺萬國之歡既交於沖漠一人之慶遂及於歧蠕孚于上下之間極乎帝王之盛臣被學最舊蒙恩浸深莫侍甘泉之祠獨嘆周南之滯第從臣之嘉頌未效薄材望屬車之清塵但馳遠思

謝元豐元年歷日表

曾鞏

一遠闕庭十移星厯顧彫零於齒髮無報補於毫分伏惟 皇帝陛下敘大禹之九疇齊有虞之七政陰陽寒暑罔不若時草木昆蟲舉皆遂性循用頒正之典寵詒分土之官臣幸備守藩預聞告朔去親方遠已驚歲月之新許國雖堅更嘆功名之晚惟體在民之意庶裨及物之仁

謝翰林侍讀學士表

范鎮

省中四禁忘誤其一苟或有犯加罪不原猥蒙貸全猶藉親近內自循省以榮為憂竊以賞而受賞者若固有之善賞也罰而被罰

者知自取之善罰也成王舉魯七百里之地以封周公周公拜於前魯公拜於後而不以為泰者功所當也管仲奪伯氏駢邑三百沒齒無怨言者罪所宜也伏惟 皇帝陛下錄社稷之功而賞加輔臣重書詔之失而罰及學士賞所當賞罰所當罰明命一出中外聳然因使天下之人曉然知 先帝與子之明而羣臣得君之慶臣於此時死固無憾況蒙再造使之更生者乎重念臣出乎遠方孤陋朴拙臣子忠義則嘗講聞朝廷典章實匪練習果緣所短有玷斯猷不加蕭斧之誅乃換金華之職雖云薄責足警羣倫且天地大恩固無論報之理而冰霜素節猶有持守之常願堅初心以收來効

謝致仕表

范鎮

早衰多病得謝歸休有命自天所容如地仰銜恩紀伏竊兢榮伏念臣本出孤生歷塵廡仕曾無報効虛積歲時仕宦之年已更一世遭逢之幸實事 三朝徒有愚忠以自信處雖曰乞身而去敢忘憂國之心因敘人言上千天聽曲蒙寬貸未賜誅夷得於盛明之時以遂閑適之性伏惟 皇帝陛下審持賞罰而一委於公總秉權綱而不放於下集羣議為耳目以除壅蔽之姦任老成為腹心以養和平之福躋民富壽措國康寧臣之至情實在於此

謝龍圖閣直學士表

宋敏求

推宸辰之誤恩備禁塗之常從聞命榮抃省躬兢惶伏念臣性理蠢冥局致庸近猥緣承學之舊寢沐右文之風 英宗皇帝拔自書林宣於詞掖雖汲黯蚤進謬旅於雋游而蕭育稀遷自安於拙分一切獎拔星紀僅周固嘗勵翼其心靖其所守顧命義以弗苟務忱恂而匪他以至陟諫臣之坡司史氏之筆還儒館而塵麗正之職分使節而贊甘泉之儀益忻聖且之親逢莫匪臺家之茂選而曲綏皇眷冒進榮階謂臣嘗事 先朝典右曹之緡綍俾臣特陞延閣直西序之圖書撫棄迹以重收帖寵名而差敘帶環申錫詔檢垂褒此蓋伏遇 皇帝陛下權綱大新恩斷中出均天地之

平施煦及陳芟回日月之餘光豐於蔀室致茲窳器亦預清班敢
不慎服官箴勤殫忠蘊庶圖來效少報洪私

安州謝上表

滕甫

屢致人言固宜竄竊曲蒙天造尙賜保全雖易守符仍叨善地士
民純秀幾同廣魯之流風里俗驩康正值元豐之樂歲安閒事簡
尸素爲慙伏念臣本以愚儒出逢真聖首蒙國士之遇最在眾人
之先便欲碎首以酬恩未知死所故嘗指心而自誓惟有天知況
事任旣已徧更在人情寧不愛惜豈有固爲緩縱自取顛隳惟日
月之至明亮肺肝而必照矜憐舊物收置近藩而朝廷難廢於公
言故君父特存於大體稍從遠外終不棄捐願臣何人受恩若此
此蓋伏遇 皇帝陛下神聖徧物清明在躬化覃無外之封疆仁
及何知之草木況臣累更器使粗效愚衷眷此遺簪嘗辱提攜之
末譬之行葦更收踐履之餘臣敢不祇奉簡書服勤吏役雖桑榆
之景景將逼暮年而犬馬之微誠猶思後效

謝澶州簽判表

程顥

論議無補職業不修國有典刑罪在誅戮曲蒙宏貸仰荷洪私期
於糜捐莫可報謝臣性質朴魯學術空虛志意粗修智識無取
陛下講圖大政博謀羣材過聽侍臣之言猥加風憲之任臣旣遭
遇明聖亦思誓竭疲駑惟知直道以事君豈忍曲學而阿世屢進
闕疎之論愧非擊搏之才徒嘗劄漑肺肝曾無裨補毫髮旣不能
繩愆糾繆固不願沽直買名豈敢冒寵以居惟是奉身而退自劾
之章繼上闔門之請架堅天意未回憲章尙屈更奉發中之詔俾
分提憲之權不惟沮諍論之風亦懼廢賞刑之實力形奏述恭俟
誅夷此蓋伏遇 皇帝陛下極天清明普日臨照洞正邪之心迹
辨眞僞於幽微察臣忠誠恕臣狂直不忍寘諸重辟投之遠荒解
其察視之官處以便安之地生成之賜義固等於乾坤涵容之恩
重益逾於山嶽臣敢不日新素學力蹈所知秉心不回信道愈篤
願徇小夫之志不爲儒者之羞或能自進於尋常庶可仰酬於萬

代謝進和御詩獎諭表

强至

參羣篇而奏御賚載非工被優詔之發中褒嘉甚渥惕然拜君父之賜藏以為子孫之榮伏以書曰帝庸作歌所以極道明良之意雅云臣能歸美所以上酬福祿之辭惟千載一時之逢踰三王二帝之際乘太平之多暇講稀闊之盛游歷寶宇以披祖宗相受之文御飛帚以縱神聖有餘之學以至置酒別殿賦詩中宸于時從聯咸續睿唱如臣者有朴愚而植性無文采以表身自陪風憲之要司都廢雅言之舊學妄挾鄙思綴成斐章大樂在前發哇聲而接響太陽臨下銜燭火以交光既躋邃旒若臨深谷敢謂兼容之度例形過獎之辭游聖門者謂之難言矧繼堯文之後踰華衮者重夫褒字矧蒙漢訓之加夫何孤臣竊此厚幸此蓋伏遇尊號皇帝陛下齊德乾覆育材士倫善雖小而弗遺力或矜其不逮誓竭講劄之效庶酬假勛之仁

代都運趙待制謝上表

强至

小材而臨大計不知經畫之所從薄量以函厚恩唯有思勤而可補竊以今之北道重曰外臺邊宿勁兵境控疆虜歲支洪河之備而民力幾屈所以艱於賦輸地列數鎮之師而吏員益繁所以要在刺舉宜擇精明疆濟之器以付轉給澄清之權若臣空孱於事迂拙難引兩川之漕近貳大農之司率稱竭於愚衷訖罕通於利術敢期煩使乃委孤臣此蓋伏遇皇帝陛下廓天地之容收涓埃之細特加不次之命而欲勸來者弗責已試之効而俾懷後圖得不夙夜以思始終乃職豈敢顛聚斂之最以上累於君仁亦當拊凋殘之餘庶下蘇於民瘼

代謝再任表

强至

惘惘系陳從欲許還於新節衰疲自力竭能勉撫於舊封委寄逾隆顛躓自懼伏念臣本緣一介之曲學力被三朝之誤知自解宰鈞繼紆守紱早年遇事風霜不計於殘軀晚歲纏痾藥餌乃同

於常膳比引揣躬之分數裁辭劇之章力丐閒州少安病質而恩
生望外事與願違俄更西雍之師旄仍付北門之留鑰所以極陳
去就仰躋聰明幸寵利非事君之宜必冀寢加恩之命策疲篤雖
老臣可彊敢不拜再任之休訖奉俞音兩諧愚懇此蓋伏遇 皇
帝陛下至仁天冒盛德海函器使庶工愛徧舊物雖俊傑甚眾並
試有爲之時而疋瘁之餘惜投無用之地敢不勤宣條教兼拊兵
民儻溝壑之未填尚乾坤之可報

宋文鑑卷第六十七

宋文鑑卷第六十八
表

淮南轉運使謝上表

右僕射待罪表

衡州鹽倉謝上表

青州謝上表

知亳州謝上表

知襄州謝上表

徐州謝上表

徐州賀河平表

謝失覺察妖賊放罪表

謝宣召入院狀

謝侍讀表

杭州謝放罪表

蘇頌 蘇頌 劉摯 劉摯 劉摯 劉摯 蘇軾 蘇軾 蘇軾 蘇軾 蘇軾 蘇軾 蘇軾 蘇軾 蘇軾 蘇軾

又謝太皇太后表

蘇軾

賀駕幸太學表

蘇軾

賀賜曆日表

蘇軾

賀立皇后表

蘇軾

謝禮部尚書表

蘇軾

謝賜對衣金帶馬表

蘇軾

謝復官提舉玉局觀表

蘇軾

建寧府節度副使謝表

呂惠卿

賀元日大朝會表

呂惠卿

謝翰林侍講學士表

范祖禹

淮南轉運使謝上表

蘇頌

贊畫甘泉久玷三臺之末觀風淮甸驟陞數使之榮朝寄匪輕地
望兼重愧非才選靡稱厥官姑謹詔期趣行所部寵靈所被畏惕
非常竊以州郡備官所以分釐於民務朝廷遣使所以布宣於主

恩付一道之事權用六條而舉察賦輿出內俾以均輸吏治否臧
責之薦黜自匪縣吏於事任詎能振肅於治綱若臣者才不足以
適時慮不足以經遠偶緣資級之例得從選用之階始自書坊出
分使竹俄從寰服入佐計籌粗收歲月之勞蔑著毫分之效豈謂
伏遇皇帝陛下察庶工之任使矜久職之良勤拔於省僚授以利
柄矧惟清海之部實益東南之衝昔號奧區今逢樂歲五稼盈疇
而遂茂四人勤力以厚生料乎漕運之程無煩趣辦之急惟當敷
宣惠澤通究物情編齊之利病可更立求其本刑政之重輕或失
當適其中止期靖嘉少稱論擇若乃事體貌以為風采盡銖兩以
斂民財顧在懦愚誠多闕略重念上慈天覆聖治日新官無內外
之殊事悉憂勤之繫昨臣受任之始獲面於清光陛下臨遣之言
曲加於勉諭自省最為於疎遠何圖亦記於淵衷豈非以委任之
優故特示拊循之厚雖乾坤平施非報謝之可言而犬馬微生第
勤勞而思奮儻驅馳之有用期終始以無踰

右僕射待罪表

蘇頌

聖恩深厚仰戴曷勝孤迹兢危彷徨靡所切以宰輔大任表率百官人望所歸則論議行而必信物情不與則名器輕而易搖而臣猥以朴愚誤蒙任使上不能謨明國體以熙庶工下不能甄別人材以協眾望誤朝有譴擢髮寧窮致招人言上黷天聽名一註於白簡罪當寘於丹書雖二聖覆之如天未令投迹於四裔而羣言謂其失職豈宜包羞於近班是以屢貢封章冒塵旒纒再紆中札曲諭宸衷捧詔驚惶重自思省本欲便祈於歸老屬茲方負於罪辜儻布懇誠懼為僭越在臣進退之分敢計重輕於國廢置之閒實關勸沮伏望太皇太后陛下皇帝陛下矜憐甚懇本無它腸案舉嚴科亟行幽黜一則安全於介拙尚保餘生一則厭息於煩言遂清朝路

衡州鹽倉謝上表

劉擘

議合獻言知典刑之無赦原心觀過荷仁聖之有容貸其餘生處以善地伏念臣稟生艱拙遭世盛明學不能窮理而知幾材不足趣時而適變晞名涂以旅進濫文館之末游和鉛何功索米逾歲閒承人之偶攝掾於中堂旋誤聖知使備員於憲府仍職書林之舊就行御史之中始自愚臣前無故事方陛下繼承於五聖而國朝平治者百年力勤肯穫之田大解不調之瑟蒐拔羣材而審以器使變化百度而曠然日新臣於此時職在言路誓殫忠義敢避勢權寧以孤睽訐切拂眾而危身不忍從容唱和負恩而速進狂愚自信裨益無方故宿官之日幾何而瞽言之罪非一至如均民而弛役因之率戶而出泉雖慮始樂成者愚人之不知然損下益上者先王之大戒輒條十害冀補萬分議臣見譏以為敗謀而亂化清衷獨見知其有責而盡言不徇以誅止容其去褫臺閣之二職置瀟湘之一涯有祿食使之存全有職事可以報效銜恩載幸揣分增憂此蓋伏遇皇帝陛下察臣孤忠全國大體不惜劬一夫之法庶幾留眾正之門謹當上體恩仁期於必報下堅節義死而

不渝

謝青州到任表

劉摯

東方大國莫如鄆青愚臣何人繼命帥守蒞官茲始揣已不遑伏念臣器蘊至疏智靈弗競遭會繼明之始越膺共政之圖三府空逮於六期千慮蔑聞於一得雖進退必繇其道常願學乎聖人而功烈如此其卑終難收於士論寬典刑於司敗假邱壠之便藩報政稽期實愧三年之魯改符易地猶叨四履之齊惟時東秦號一都會士知禮義境控海山厥民富饒少敝攘之舊習其俗舒緩有平易之餘風謹於承流可以無事曾是迂愚之品獲塵寄委之優此蓋伏遇皇帝陛下乾健而粹純豐中而光大沉幾以通變化定鑑以御妍媸人無遐遺材以器使臣敢不振厲衰境激昂至恩簡禮去煩稍究前修之治推仁宣澤庶求遠俗之安儻集涓微仰酬覆幬

知亳州謝上表

劉放

齒髮衰暮藩鎮會繁據非所安榮以為懼昔者聖門高第方六七十則所願為漢世諸儒至二千石謂之達官蓋量力審己雖小邦實曰才難逢辰慕君在有道不容徼幸此所以前哲言志區區其若彼後賢受祿振振焉在茲況如愚臣本緣末學粵塵仕路不弃昌時暨忝分符遂更三郡曹為近輔非復自檜之譏魯并泰山仍有變齊之舊至於渦譙名壤淮楚近郊猶龍之所誕生真聖是焉臨幸大朝景毫兼武湯之上儀迎年執期格帝鴻之純貺民俗既富官守維嚴豈伊戇愚猥叨寄任邈逾涯分高視曩先密焉自思仍有餘寵獸擊換舊僅踰朞月之淹隼旆越疆纔倍宿舂之費此蓋伏遇皇帝陛下聖神妙算睿智極深廓久照於容光溥大和於播物流形品彙默化陶鈞致是小材預膺榮遇謹當布宣詔旨盡瘁官箴為身愚謀雖冀不殆於知止報國本願尚謝餘生於自然誓殞百身勿渝一志

知襄州謝上表

劉放

脫身謫籍縲組近藩仰荷恩華不任感懼臣早者濫承人乏出假使車材非所長力不自料黽勉歲月孤負選掄是所謂斗筭之才何暇論繩墨之外然惟利術至廣巧者有餘果聞係踵之後人略取析豪之上第涇以渭濁故常畏於後生李代桃僵竊自悲於薄命遽辱黜幽之典實由既往之愆浮舟江湖託身瘴癘無復自新之望長懷永弃之憂不謂明詔發中湛恩逮下俾復乘軒之寵仍加分虎之榮情同更生感惟出涕此蓋伏遇皇帝陛下離明廣照乾度并容紹庭之初方勤心於陟降思皇之際亦代置於細微以是屏愚得從甄敘謹當勉求民瘼恪佩官箴犬馬之心以勞力故能有養桑榆之景雖已老尙冀無渝

徐州謝上表

蘇軾

分符高密已竊名邦改命東徐復塵督府荷恩深厚撫已兢慙伏念臣奮身農畝託迹書林信道直前曾無坎井之避立朝寡助誰爲先後之容向者屢獻警言仰塵聖鑒豈有意於爲異蓋篤信其

所聞顧慙迂闊之言雖多而無益惟有朴忠之素既久而猶堅遠不忘君未忍改其常度言之無罪實深恃於至仁知臣者謂臣愛君不知臣者謂臣多事空懷此意誰復見明伏惟皇帝陛下日月照臨乾坤覆燾察孤危之易毀諒拙直之無他安全陋軀畀付善地民涓訟簡殊無施設之方食足身閑仰愧生成之賜願力報之無所懷孤忠而自憐

徐州賀河平表

蘇軾

聖謨獨運天眷莫違庶邦子來民罔告病萬杵雷動役不逾時遂消東北莫大之憂然後麥禾可得而食人無後患喜若再生伏以大河爲災歷世所病禹治兗州之野十有三載乃同漢築宣房之宮二十餘年而定未有收狂瀾於既潰復故道於將堙俛仰而成神速若此恭惟皇帝陛下至仁博施神智無方達四聰以來眾言廣大孝以安宗廟水當潤下河不溢流屬歲久之無虞故患生於所忽方其決也本吏失其防而非天意及其復也蓋天助有德而

非人功振古所無溥天同慶維豐沛之大澤實汴泗之所鍾伊昔
橫流凜孤城之若塊迨茲平定蔚秋稼以如雲害既廣則利多憂
獨深而喜倍雖官守有限不獲趨外庭以稱觴而民意所同亦能
抒下情而作頌

謝失覺察妖賊放罪表

蘇軾

盜發所臨守臣固當重責罪疑則赦聖主所以廣恩自驚廢逐之
餘猶在愍憐之數伏念臣早蒙殊遇擢領大邦上不能以道化民
達忠孝於所部下不能以刑齊物消姦宄於未萌致使妄庸敢圖
僭逆原其不職夫豈勝誅况茲溝瀆之中重遇雷霆之譴無官可
削撫已知危至於捕斬羣盜之功乃是鄰近一夫之力謹言其始
偶出於臣雖為國督姦常懷此志而因人成事豈足言勞勉自列
於涓埃庶少寬於斧鉞豈謂蕩然之澤許以勿推收驚魄於散亡
假餘生之晷刻退思所自為幸何多此蓋伏遇皇帝陛下舞虞舜
之干示人不殺祝成湯之網與物求生其閒用刑本不得已稍有

可赦無不從寬務在考實而原情何嘗記過而忘善益悟向時之
所坐皆是微臣之自貽感愧終身論報無地布衣蔬食或未死於
飢寒石心木腸誓不忘於忠義

謝宣召入院狀

蘇軾

詔語春温再命而僂使華天降一節以趨在故事以嘗聞豈平生
之敢望省循非稱愧汗交深竊以視草之官自唐為盛雖職親事
秘號為北門學士之榮而祿薄地寒至有京兆掾曹之請豈如聖
代一振儒風非徒好爵之縻兼享大烹之養玉堂賜篆仰涓化之
稱文寶帶重金佩元豐之新渥既厚其禮愈難其人而臣以空疎
冗散之材衰病流離之後生還萬里坐閱三遷不緣左右之容躡
處賢豪之上此蓋伏遇皇帝陛下生資文武天祚聖神雖亮陰不
言尚隱高宗之德而訪落求助已啟成王之心首擇輔臣次求法
從知人材之難得采虛名而用臣敢不益勵初心力圖後效才不
逮古雖慙內相之名志常在民庶免私人之誚

謝侍讀表

蘇軾

北門視草已叨儒者之極榮西學上賢復玷侍臣之高選省循非稱愧汗交懷竊惟講讀之臣止以言語為職考功課吏無殿最之可書陳善閉邪有膏澤之潛潤豈臣愚陋亦所克堪此蓋伏遇太皇太后陛下憂思深長德業久大受先帝投艱之託為神孫經遠之謀故選左右前後之人罔非吉士使知興亡治亂之效莫若多聞謂臣雖無大過人之才知臣粗有不欺君之實故使朝夕與於討論奉永日之清閑未知所報畢微生於盡瘁終致此心

杭州謝放罪表

蘇軾

臣近以法外刺配本州百姓顏章顏益二人上章待罪奉聖旨特放罪者職在承宣當遵三尺之約束事關利害輒從一切之便宜曲荷天慈不從吏議伏念臣早緣剛拙屢致憂虞用之朝廷則逆耳之奏形于言施之郡縣則疾惡之心見于政雖知難每以為戒而臨事不能自回苟非日月之明肝膽必照則臣豈惟獲罪於今日久已見傾於眾言恭惟皇帝陛下濬哲生知清明旁達委任羣下退託於不能愛養成材惟恐其有過知臣欲去一方之積弊須除二猾以示民特屈憲章以全器使臣敢不省循過咎祗服簡書眷此善良自不犯於漢法時有貸捨用益廣於堯仁

又謝太皇太后表

蘇軾

亂羣之誅不請而決蓋恩威之無素致姦猾之敢行方俟譴訶豈期寬宥伏以法吏網密蓋出於近年守臣權輕無甚於今日觀祖宗信任之意以州郡責成於人豈有不擇師帥之良但知繩墨之馭若平居僅能守法則緩急何以使民顧臣不才難以議此恭惟太皇太后陛下寬仁從眾信順得天推一身之至公納萬方於無罪而臣始終被遇中外蒙恩謂事有專而合宜情無他而可恕故加貸捨以示寵綏朝廷之明粗以臣為可信吏民自服當不令而率從

賀駕幸太學表

蘇軾

輦回原廟既崇廣孝之風幄次儒宮復示右文之化禮行一日風動四方臣聞五學之臨三代所共蓋天子不敢自聖而盛德必有達尊在漢永平始舉是禮雖臨雍拜老有先王之規而正坐自講非人主之事豈如允哲退託不能奠爵伏興意默通於先聖橫經問難言各盡於諸儒恭惟皇帝陛下文武憲邦聰明齊聖大度同符於藝祖至仁追配於昭陵故舉舊章以興盛節臣早塵法從久侍經幃永矣馳誠想聞合語於東序斐然作頌行觀獻馘於西戎

謝賜歷日表

蘇軾

歲頒正朔蓋春秋統始之經郡賜璽書亦漢家寬大之詔實為令典豈是空文伏以望歲者生民之至情畏天者人君之大戒所以常言報應而不言時數每奏水旱而不奏嘉祥上有銷復之心下有變調之道固資其理同底純熙恭惟皇帝陛下祗敬三靈憂勤萬宇為仁百世自然天下之歸教民七年豈無善人之效臣敢不仰遵堯典寅奉夏時謹隄防溝洫之修行勞來安定之政庶殫綿

力少助至仁

賀立皇后表

蘇軾

纘女維莘倪天之妹事關廟社喜溢人神臣聞三代之興皆有內助二南之化實本人倫維關雎正始之風具既醉太平之福民有所恃邦其永昌恭惟皇帝陛下自誠而明惟睿作聖輯寧夷夏德既茂於治朝輔順陰陽政兼脩於內職既膺大慶益廣至仁下逮海隅夫婦無有愁歎上符天造日月為之光明受祿無疆與民同樂

謝禮部尚書表

蘇軾

備員西學已愧空疎易職東班尤驚忝冒遂領宗卿之任并為儒者之榮始臣之學也以適用為本而恥空言故其任也以及民為心而慙尸祿乃者屢請治郡兼乞守邊欲及殘年少施實效而有志莫遂負愧何言今乃以文字為官常語言為職業下無所見其能否上無所考其幽明循省初心有覲面目故於拜恩之日少陳

有益之言孔子曰一言可以興邦而孟子亦曰一正君而國定昔漢文悅張釋之長者之言則以德化民輔成刑措之功而孝景入晁錯數術之語則以智馭物馴致七國之禍乃知爲國安危之本只在聽言得失之間恭惟陛下即位以來學如不及問道八年寒暑不解講讀之官談王而不及霸言義而不及利八年之間指陳至理何啻千萬雖所論不同然其要不出六事一曰慈二曰儉三曰勤四曰慎五曰誠六曰明慈者謂好生惡殺不熹兵刑儉者謂約已省費不傷民財勤者謂躬親庶政不近女色慎者謂畏天法祖不輕人言誠者謂推心待下不用智數明者謂專信君子不雜小人此六者皆先王之陳迹老生之常談言無新奇人所易忽譬之飲膳則爲穀米羊豕雖非異味而有益於人譬之藥石則爲耆術參苓雖無近效而有益於命若陛下信受此言如御飲膳如服藥石則天人自應福祿難量而臣等所學先王之道亦不爲無補於世若陛下聽而不受受而不信信而不行如聞春禽之聲秋蟲

之鳴過耳而已則臣等雖以三尺之喙日誦五車之書反不如醫下執技之流簿書奔走之吏其爲尸素死有餘誅伏願陛下覽臣言少留聖意天下幸甚

謝賜對衣金帶馬表

蘇軾

服章在笥賁及衰殘御勒過庭喜先徒御伏以物生有待天施無窮草木何知冒慶雲之渥采魚鰕至陋借滄海之榮光雖若可觀終非其有妻孥相顧驚屢致於匪頒道路竊窺或反增於指目此蓋伏遇太皇太后陛下聰明齊聖陳錫載周含垢匿瑕而察於求賢卑宮菲食而侈於養士士豈輕於千里念非其人言有重於兼金當思所報

謝復官提舉玉局觀表

蘇軾

七年遠謫不意自全萬里生還適有天幸驟從縲紲復齒縉紳伏念臣才不逮人性多忤物剛褊自用可謂小忠猖狂妄行乃蹈大難皆臣自取不敢怨尤會真人之勃興與萬物而更始而臣獨在

幽遠最爲冥頑迨茲起廢之初倍費生成之力終蒙記錄不遂弃捐此蓋伏遇皇帝陛下正位龍飛對時虎變神武不殺孰非受命之符清淨無爲坐獲銷兵之福聰明不作邪正自分使臣得同草木之微共霑雷雨之澤臣敢不益堅素守深念往愆沒齒何求不厭飯疏之陋蓋棺未已猶懷結草之忠

建寧軍節度副使謝表

呂惠卿

備嚴近之選而抵非常之愆當清明之朝而罹甚重之譴孽乃自作咎將誰歸伏念臣起自諸生暗於大道持竅啟之聞而欲經於事變信呻吟之得而希掛於功名分既過逾理宜顛越矧先帝有爲之始乃羣材願効之時輒先要津以闕賢路雖預討論者三四事而參幾務者一二年凡是蠹國害民之由實臣懵學誤朝之致豈亦下流之所處更令眾惡以皆歸偶失當時士師之刑難逃今日司直之論尚蒙善貸未寘嚴誅特從四裔之遷以正三凶之比衰疲遠謫人皆知其難堪親愛生離聞者爲之太息伏惟皇帝陛下

賀元日大朝會表

呂惠卿

下天仁自得聖孝光充撫弓劍之遺藏每加悽愴顧廟堂之舊物靈不盡傷特罪悔之至深猶典刑之爲屈龍鱗鳳翼已絕望於攀援蟲臂鼠肝一冥心於造化涕逐言出莫知所從

謝翰林侍講學士表

范祖禹

辭其可辭敢忘故事受其可受祇服新恩洪惟真宗初置講職問學常勤於日昃論經或至於夜分以啟迪於後人俾監觀于成憲先帝更新治職止命兼官雖因革之制不同而經緯之文則一惟

熙寧元豐之成烈有金匱石室之舊聞不顯帝謨尙資史筆追觀
列聖之典多委四輔之臣夫何一介之微膺此二任之重此蓋伏
遇皇帝陛下欽明文思齊聖廣淵如日方中法天不息謂二帝三
王之道當窮極於高深一祖四宗之書已光昭於永久惟念終於
典學聿追孝於前文以臣夙侍書筵叨塵史觀曲加寵數用示眷
留昔魯穆公之於子思亟饋鼎肉燕昭王之於郭隗改築金臺二
子者或以無人乎側而不能安或欲致士於遠而先爲始如臣陋
學敢望古人非懷人爵之可榮竊喜聖心之不倦

宋文鑑卷第六十八

宋文鑑卷第六十九

表

開封府羣見致辭	林希
尙書禮部元會奏天下祥瑞表	林希
尙書省謝車駕臨幸表	林希
亳州謝賜卹刑詔書表	林希
謝天章閣待制表	林希
賀皇后冊禮表	林希
代范忠宣賀平河外三州表	林希
京東運副謝致到任表	林希
謝賜資治通鑑表	張舜民
謝諫議大夫表	張舜民
謝賜卹刑詔表	李清臣
免加右光祿大夫表	李清臣

謝中書舍人表

謝尚書右丞表

賀明堂表

降朝請大夫謝表

代賀景靈宮奉安御容禮畢表

開封府羣見致辭

臣希等伏以聖人在上首善始於京師天下修文貢士興於明畝此乃伏遇尊號皇帝陛下仰稽古道下育人材發明詔於多方命興賢於列郡臣等繆當詔旨輒與能書雖為草野之臣得奉天庭之貢

蘇轍

蘇轍

蘇轍

蘇轍

呂希純

林希

尚書禮部元會奏天下祥瑞表

林希

臣珪等言尚書禮部得元豐五年天下所上祥瑞宜徵南院使判北京臣拱辰承議郎提舉河北常平等事臣宜之通議大夫知秦州臣公孺龍圖閣待制知青州臣綰正議大夫知安州臣甫朝議

大夫知興元府臣景華朝奉大夫知榮州臣震西上閣門使知雄州臣舜卿禮賓使知安肅軍臣孝綽文思使知憲州臣詵朝散郎知鼎州臣伋知歙州臣堯封朝奉郎知蜀州臣少連承議郎知安德軍臣從諒知利州臣山等言所部有芝生於州宅寺觀殿閣柱有七莖者一苗長尺餘者六牛生二犢者二嘉禾合穗者三五本合為一者一麥一莖三穗者四四穗者五穗者百餘穗者各一白烏白鵲生於巢者各一臣聞聖人出而四海清帝命昭而萬靈集必致諸福之物以表太平之符伏惟皇帝陛下體堯之仁躬舜之孝力行勤儉而本以化物誠意惻怛而出於愛民是以指麾之間功業成就覆載之內陰陽協和蒙被羣生浹肌膚而淪骨髓涵濡異類霑動植而洽飛翔仰而觀者景星慶雲俯而視者醴泉甘露扶疎燁燁發為朱草三秀之英游泳服馴則有白麟一角之異嘉葩連理之木異畝同穎之禾巢鵲可附而窺池龍可豢而擾謂宜作為聲詩而奏於郊廟深詔太史而著之簡編以永無疆之休以

昭特起之蹟考諸已往固可謂絕世之殊祥抑而弗宣猶以為盛德之餘事自時所紀殆不絕書今者駕鸞輅以充明庭撞黃鍾而御太極典禮大備官儀一新殊方駿奔重譯輻湊自昔辨髮卉裳鞞縻之所未至踰沙軼漠言語之所未通咸奉玉帛而介九賓襲衣冠而獻萬壽烜赫威德冠古超今巍巍煌煌傳示亡極鋪張王會之眾美褒對皇家之盛容臣等恭率有司伏尋故事稽參圖謀宜先象齒之珍敷道句臚敢上龍墀之奏歡呼抃蹈倍萬常情

尚書省謝車駕臨幸表

林希

天臺肇建具崇喉舌之司帝車下臨增重陸廉之寄非常之舉視古無倫恭惟皇帝陛下天縱多能日新盛德剷除眾弊裁制萬微考先王之董治官立尚書以為政本紀綱條理見微旨於新書勅作規模別牧司於著位蓋慮之積年而成於茲日聞諸前世而驗於方今忽紆清蹕之傳采聳鴻都之觀且北辰居極外環象斗之宮而黃道所經旁及積星之位瞻威顏於咫尺被法語之丁寧勅

以在公退而交倣分曹帥屬燦然周典之文望輦拜恩陋彼漢郎之歎矧復宗藩旅進禁從相趨凡獲侍於宸遊皆預窺於聖作歡聲載溢慶榮遇於一時信史備書流美談於萬世臣等叨膺重任久負明恩願懷備位之慙第劇逢辰之幸敢忘策勵期稱寵臨

亳州謝賜卹刑詔書表

林希

奉聖詔之丁寧見上心之欽恤恭惟皇帝陛下治道清淨本堯舜之性仁訓辭哀矜同禹湯之罪已雖推行故事實憂閔黎元臣所領州地號重法南為故楚北則全齊椎埋為姦其來尚矣殺越于貨聞或有之嚴設檢防深用懲艾臣初至問俗云比年稍登咸知愛身頗重犯法夫廉恥以衣食為本豐凶者獄市之原民之常情勢自當爾臣謹遵奉成憲申戒有司囹圄之間敢遂期於無犯縲繫之下庶罔底于非辜祇循寬條用塞吏責

謝天章閣待制表

林希

忽繇疎遠俾冒恩榮進不得辭退何勝懼臣竊惟朝廷名位本以

待殊尤特起之才臺閣縉紳宜序進於侍從論思之列分義既定
品流自安敢意超踰俟及孤外伏念臣少而嗜學仕則爲貧擊柝
抱關初安一命磨鉛削槩忝事三朝金馬石渠出入殆逾於二紀
皇墳帝典討論嘗預於片言一去軒墀五更符印方兩宮之旰食
閔赤子之阻飢申勅守臣悉發常平之廩蠲裁歲計就輟上供之
儲全活者一方更生者萬口父老至於感涕童稚莫不驩呼脫於
溝壑之虞皆自乾坤之施願臣無職在法何逃覈實之誅屏息以
俟伏遇皇帝陛下智周萬物明燭四方通達下情靡遠邇戚疏之
有聞主張善類故包函庇覆以無遺既保有以曲全復矜憐其久
坎拜恩舊服玷籍近班譽生不虞寵出非望無循吏之政誤被璽
書之褒有稽古之恩曷稱服章之錫況臣心甘寂寞年迫衰遲分
以滯蒙老於冗散今茲收擢彌甚驚憂惟是偏州適承自詔漕由
京口控全吳飛輓之衝壞復古城救積歲旱乾之患方且身先畚
築手諭準繩計蚤莫以收功成江淮之長利儻容戮力豈憚糜軀

天日九重但心存於北闕圖書三閣許夢到於西清

賀皇后冊禮表

○原闕尾廿四字從歸安陸氏所藏端平重修大字本借鈔補刊

林希

躬御大廷肆陳徽冊班行第入踐宮朝臣聞自古有邦必先正
始故易以家人治內而詩美關雎好逑維時盛明克備儀物恭惟
皇帝陛下聰明文思不學而成恭儉憂勤所聞者化太皇太后深
惟坤極之配實重人倫之基率以舊章應於古義蓋天地社稷之
事勸相其難卿士龜筮之從諏謀是吉矜聲申戒禕翟增華左右
承顏交致三宮之養春秋奉祀共祇八廟之靈陰教具宣宸闈有
慶臣守藩居外望闕無階蹈詠之誠寔均凡庶

代范忠宣賀平河外三州表

○原闕從歸安陸氏所藏端平重修大字本借鈔補刊

畢仲游

平戎韜略靡用干戈陷虜衣冠自還里閭豈特犬羊之效順行知
鋒鏑之可消患弭一隅治形四海伏以善戰之至初無勇功神武
之行亦云不殺矧羗夷之叛服如禽獸之去來始非得已而用兵
終則附懷之有道巢穴可窮而不問邊陲安堵而自如情狀益殫

欵誠屢至遂門革面相與鄉風既內懾於威靈遂盡歸其俘獲殆
非力致純以德來矧是生還率常死節度湟伐木不煩充國之謀
謁廟賜田如見子卿之返此蓋伏遇 皇帝陛下上仁兼覆盛德
惟新小二漢之邊功盡三王之能事眷惟士伍偶隔聲明鞮譯在
塗既奉君臣之義衣裳改衽復從父母之邦邊候告寧人情底豫
豈異七旬之格是為千載之逢臣頃預政機親聞睿算比分憂寄
獲覩成功再拜奉觴雖阻漢庭之列大書作策永為宋史之光感
頌之私倍萬常品

京東運副謝到任表

○原闕從歸安陸氏所藏端
平重修大字本借鈔補刊

畢仲游

分符京右方謹頒條改使山東猥當外計恩私併及感惕交深伏
念臣本以書生學從吏道和鉛抱槧既非博洽之名流攬轡登車
又乏經營之旅力出沒風波之險支離疾病之餘每虞寄任之難
勝顧以廢閑而為幸比蒙牽用已戴生成未遑宣布於上恩乃復
叨移於劇部仍遷將漕稍昇事權雖知繁使之可榮大懼蒞材之

速戾此蓋伏遇 皇帝陛下法天廣大如日照臨道滋務於遠圖
器不遺於近用謂從事詔條之內常欲力行故遣司調度之煩試
觀心計臣敢不三思厥職一意在公必祇赴於會期以圖報上亦
愛養其基本不至病民非專官謗之逃冀合公家之利

謝賜資治通鑑表

張舜民

臨政願治乃明主之用心受詔修書皆儒臣之能事成而進御寵
以匪頒何彼下臣遽霑優賜恭惟英宗皇帝生知典學性好觀書
豈上求之多聞實欲輔之自得然萬機叢委載籍紛繁自學者不
得遍窺況人主何暇周覽思有所述頗難其人疇若人哉莫如光
者給尚方之筆札萃三館之圖書許自辟官用資檢討量加常俸
不責課程上下馳騁於數千載之閒出入將隨於十九年之內其
閒明君良臣箴規議論切磨之精語名將循吏方略教魁梧之
偉功休咎庶證之原天人相與之際抉擿姦宥褒崇善良網羅羣
言囊括舊史如海之藏珍怪魚龍之無數如山之包草木鳥獸之

難名披分畎澮之末流蔽映彫蟲之小技旅遊東國常屢歎於斯
文留滯周南遂克終於先業雖古者興亡事迹固已燦然而光之
筋力精神於此盡矣尚苦言官之督責熟諳俚俗之謗嗤卒成一
代之書仰副兩朝之志揭為通鑑時則弗迷資彼治原捨茲安出
神宗皇帝飭講筵而進讀揮宸翰以賜名製序而冠其篇端鏤板
而布之天下仰君臣之際會已極丹青何父子之淪亡忽悲風露
豈謂門墻之舊物退收鉛槧之微功開卷涕流拜嘉汗浹此乃伏
遇皇帝陛下聰明迪祖宵旰思皇留神於乙夜之勤訪問於西清
之奧伏遇太皇太后陛下數靈大業持載烝民安所寶之儉慈格
無疆之壽考遠追三鑑坐振四維顧一介之靡遺與羣賢而樂共
儲無擔石曾非菽水之憂家有賜書留作子孫之寶

謝諫議大夫表

張舜民

方安謫籍忽對鋒車入瞻八彩之秀毫進與七人之上列竊聞明
主臨政而願治先王為官而擇人號曰梓材取其器使若夫諫爭

之任政惟侍從之臣地密而選清秩卑而望重其所以起居言動
則與史官相表裏其所以彈訶風察則與臺憲同戚休始則專弼
人主之違今乃汎論天下之事乃者藥石不進鳧鴈僅存仗馬一
鳴茅茹不已豈謂大明之東出廓然暝雪之日消鼓之以惠風潤
之以膏澤南窮海嶠北挾江湘脫禁錮者何翅二千人計水陸則
不止一萬里死者傷嗟之不及生者扶匐以來歸昔居輔弼之崇
謀謨帝所終作蠻夷之鬼弃擲道旁古先未之或聞畢竟不知其
罪敢望桑榆之晚景獲依日月之末光招魂於楚水之涯拭目於
雲臺之表手遮西日口誦離騷齒髮摧頽謾索太倉之粟衣裳顛
倒驚聞長樂之鍾此乃伏遇皇帝陛下上當天心下厭人望見機
不俟終日從諫甚於轉圜變通得之神宗寬大類乎仁祖豈止芻
蕘之被賞將令泉壤以銜恩率是以行為國何有敢不激昂暮氣
緝理空文乘白馬而伏青蒲試圖來效餓西山而蹈東海期免後
艱

謝賜恤刑詔表

李清臣

徒孥頌繫交手傳權眈隸聞音相趨動色雷風鼓舞律呂和平屬
在守臣惟知虔命切惟歷代之為政莫若本朝之恤刑承平幾百
四十年覆養方二三萬里德如天地日月恩及草木蟲魚尚慮府
縣狴牢官曹卒吏誦司空城旦為業習柱後惠文之風喜作煩苛
私行慘刻或致孤窮亡告疾痛不聊是頒詔教之丁寧申喻州邦
之長守使之網羅寬大櫺檻疏通日與涼飈時視藥物比周王之
扇暘殆又過之雖夏后之泣辜亦止如是此蓋恭遇太皇太后陛
下睿慈燕裕仁治醇醴尊居九重之深周念四海之遠謂聖世不
專以刑為天下王者常欲以恩結民心仰靈八室之光靈垂慶億
年之統祚臣敢不奉行上意祗率外臣

免加右光祿大夫表

李清臣

宗廟穆清方禱神靈之享王庭昭曠重推雨露之恩優渥薦臻震
皇無措敢殫血懇仰冒聖聰竊以義者天下之大經分乃人臣之

常守稱多量少豈宜有失於一毛論重評輕必使外狀於羣議如
龠合之器是何足以容舖鍾如欒櫨之材彼安能以勝梁棟苟犯
滿溢之戒將貽顛覆之憂伏念臣技能素卑問學殊淺無益當時
之實用宜為盛世之畸人歷任累朝誤躋四輔日索太倉之米月
受水衡之錢職空任於股肱勤不施於竹帛同省僚列豈無邪廠
而詆訶舊山隱淪能不指背而譏笑夙宵悞報形影徬徨未退即
於幽閑已深慙於尸素更增顯寵將累至公恭遇皇帝陛下天縱
睿明日新制作欲贊斯時之美方收多士之英致此誤恩猥加朽
質任人惟舊固惟聖王之隆私受爵斯亡深懼先民之至誠冀還
異數庶息煩言

謝除中書舍人表

蘇轍

越從左史擢領西垣口出命書身參法從深念山林之迹本無富
貴之心聞命若驚固辭不獲伏念臣生本西蜀家世寒儒學以父
兄為師貧无公卿之助私有求於祿養輒自力於文詞慨然東遊

無以上達際會仁祖訪求直言策語猖狂恃聖神之不諱考官怪怒惡悖直之非宜孰知悟俗之言特被愛君之詔感激恩遇遂忘死生莫酬國士之知適有私門之禍未填溝壑重迫饑寒時於道塗望見神考一封朝奏夕聞召對之音眾口交攻終致南遷之患生雖不遇嘗辱顧於二宗時不見睿勢殆濱於九死厄窮自致黽俛何言敢云衰病之餘復被寵光之幸此蓋伏遇太皇太后陛下母慈均覆坤德无私欲以任姒之明躬行堯舜之道肆求多士以遺成王者老畢會於朝廷耕築不遺於林莽遂令拔擢猥及空疎馮唐已衰猶願雲中之往貢禹雖老未忘封事之勤譬如木之在山生則荷恩而死无所怨水之於地行則潤下而止不敢辭臣之事君義亦如此欲報之意非言所殫

謝除尙書右丞表

蘇轍

渙汗之恩已行而不反偃僕之志雖勤而莫伸上愧鴻私下慙公議恭惟皇帝陛下接堯舜之統蹈成康之仁禮貌先正耆老之臣

揀拔後來翹秀之士俛仰六載前後幾人坦然公明故不私賢否之實穆然淵默故坐照情偽之真臨御久則鑒愈明得失分則下无隱如臣者西南賤士章句小儒早歲猖狂偶竊方聞之選中年流落既安縣尹之卑遭時乏人致位近侍跌宕文墨之囿囁嚅議論之場舉皆空言安有實效願惟省轄之重實參國論之餘豈無遺賢遽及微品地寒資淺何以望三事之餘光才短力罷安能裁六聯之滯論雖復黽俛就職愧歎何言此蓋伏遇皇帝陛下天地之仁曲成草木之陋父母之愛不錄子弟之非將建大厦以覆羣工故收眾材而无弃物然臣負過其力受非所容惟有潔已无私或不孤於託付引類自助幸得免於顛隕不渝始終少答恩造

賀明堂表

蘇轍

饗帝尊親古今之大典推恩肆眚天地之至仁舉此盛儀併在今日伏惟皇帝陛下以仁御世以誠事天乾清地寧兵戢民阜人悅故神罔不宥物備故禮得以成一享園丘三謁路寢誠敬之心與

日兼茂寬大之澤靡物不蒙能事既修全福自至方將享堯舜之
上壽膺成康之令名民願所同天心是若臣頃侍帷幄稍厯歲時
譴責之深坐甘沒齒江湖之遠猶冀首邱久蟄泥塗聞震雷而惕
若深囚籠檻得清風而自疑

降朝請大夫謝表

蘇轍

罪大恩寬言者未厭官高德薄法所不容尙領真祠實出寬憲伏
念臣早塵近列無補明時下則拙於身謀上則闇於國體先朝矜
其愚陋宥以遐荒前後七年浮沉萬死偶真人之御厯敷大號以
惟新普復舊官亟叨厚祿然臣年迫衰暮知復何爲身利退藏顧
未敢請因循於此黽俛自慙雖復追削者五官仍且獲安於閑局
涵恩至厚爲幸已多此蓋伏遇皇帝陛下以堯舜之仁行成康之
政哀未忘於舊物恩許畢其餘生臣謹當杜門躬耕沒齒蔬食知
生成之難報姑靜默以待終

代賀景靈宮奉安御容禮畢表

呂希純

卽上都之福地載廣珍庭會列聖之眸容益嚴昭薦良辰叶吉縹
禮告成凡預照臨率同慶抃竊以仙源濬發帝業肇基祖功休盛
於湯文宗軌繼隆於啟誦雖寢廟時饗裸將克備於靈承而衣冠
月游館御未經於制度茂惟真主允集大成皇帝陛下孝至格天
文明若古眷神功潛躍之宇有章聖誕彌之祥夙建清都仰延眞
馭迺規恢於舊址庸考卜於新宮凜然太紫之威隱若神明之奧
惇宗有昭穆之敘謁款無來往之煩而復秘殿重深列儀坤之正
位回廊曼衍圖拱極之近寮逮不日以休功肆前期而載事璿題
灑落煥東壁之星躔藻衛森羅備甘泉之法駕奉雕輿而降格祇
王座以安安詔畢亟臨羣司徧至瞻舜瞳而增慕施禹拜以忘勤
精意克申繁禧舉集洽需雲而示惠霈解雨以疏恩嘉與羣倫同
茲大慶臣蚤塵樞幄方守塞垣阻陪鴛鷺之班徒深燕雀之賀

宋文鑑卷第六十九

宋文鑑卷第七十

代文潞公謝太皇太后表

張耒

免右僕射表

韓忠彥

謝史成受朝奉郎表

曾肇

陳州謝上表

曾肇

賀元祐四年明堂表

曾肇

南京謝上表

曾肇

徐州謝上表

曾肇

南京謝上表

曾肇

賀冊皇后表

曾肇

賀上傳國寶表

曾肇

宣州謝上表

賈易

鄂州謝上表

張商英

代文潞公謝太皇太后表

張耒

稽留君命敢求免於刑誅惠養老臣不使勞其筋力仰睿私之從
欲撫衰志以知榮伏惟太皇太后陛下厚德無疆至仁在上神孫
臨祭知保佑之聖功多士充庭見肅雍之盛德恩及草木喜同天
人臣幸以餘齡獲逢盛旦雖籩豆駿奔之事徒有心哉而禮樂大
備之時為後死者豈不偶爾尚足矜榮

免右僕射表

韓忠彥

申寵命以自天榮非意及措微躬而無地愧與憂并仰冒眷衷歷
陳危懇竊以君臣同體取象於元首股肱上下交孚相視如腹心
手足所以代天工而理物故能熙帝載以奮庸自昔御臨尤艱考
慎惟德業之兼茂乃邦家之有光伏念臣學無它長材止近用不
為詭隨以徇眾但知直道以事君遭遇聖時未曠素業贊陪機政
惟任孤忠墻高每懼於疾顛綆短固難於深汲更冒非常之寵深
虞可畏之言矧今蠹萌未消國是難一事有可否必分年號而得

行臣無忠邪槩指朋類而皆廢西方師老而財匱斗米至於千錢
北道河潰而民流十室幾於九去大需更新而猶多禁錮宿逋雖
減而尚困追償方欣大有為之時乃用不世出之士豈茲綿薄能
副詳延伏望皇帝陛下奮獨斷之明廣僉諧之訪旁求不閒於庶
位圖任況多於舊人采擢微才收還成命譽歸明主名器不輕以
假人謗息愚臣負乘免聞於致寇

謝史成受朝奉郎表

曾肇

裁成二帝之書仰資聖訓褒錄諸儒之效俯逮孤生繆進宮榮併
叨恩資省循非稱冒昧為慙竊以簡冊之傳固多帝王之書為重
文章之用非一述作之體為難在昔有邦若時稽古自周而上具
載百篇之言繇漢以還各成一代之史典謨之辭略而雅春秋之
法謹而嚴子長雖繆於是非見稱事核孟堅頗推於詳贍或患文
繁降及後人益艱是任或紀事支離而失實或設辭骯髒而不工
或疎略抵牾之相形或取舍抑揚之未當歷觀前載茲謂材難矧

兩朝功德之崇高而五世聲明之富有以至俊傑瑰奇之士檇杙
崑瑣之姦載在信書傳之後裔宜得貫穿馳騁之學溫純深潤之
辭追二典之光華垂百王之軌範如臣之鄙揣分無堪幼聞道於
父兄粗知好古長論文於師友切慕著書然而植性昏冥受材淺
落有淺見寡聞之累無屬辭比事之長遭世盛明脫身冗散天祿
石渠之奧蚤預校讐金匱玉板之文得參論次茲儒林之盛選實
仕路之殊榮特達甄收莫非帝力周旋長育咸出上恩自視庸虛
固難報稱雖勤劬於夙夜謾淹歷於歲時闡發大猷豈敢希於作
者整齊故事或可繼於前人甫臨汗簡之終適遭負薪之疾奏書
天陛阻親望於清光拜賜宸庭莫與聞於褒詔豈期推賞并及罔
功養拙藏愚久已逃於常憲因人成事茲復玷於異恩遜辭弗容
驚惶失措此蓋伏遇皇帝陛下務尊先烈祇紹永圖謂祖考之功
非形容之可既而子孫之孝在潤色之爲能深詔有司共成大典
蓋兼資於眾智不求備於一人每矜載筆之勤靡閒吹竽之濫致

茲瑣質均被鴻私螻蟻雖微素積愛君之志涓塵有補敢忘許國
之忠

陳州謝上表

曾肇

初緣細故輒丐徙州繼露危誠復求易地圖報未伸於萬一冒煩
已至於再三自非仁恕之朝當在譴訶之域聖恩甚厚私願弗違
視太守之章孱愚知幸望長安之日感涕難勝伏念臣託勢至孤
叨榮過重謀身寡術易致於人非竊祿無功難逃於鬼瞰材微命
舛福薄災深方祇歷下之行忽遘漳濱之疾顧筋骸之素憊困藥
石之交攻氣屬如絲識幾去幹已分身歸於厚夜不圖天假於餘
生恍如夢寐之初回憺若醒醲之未解神明凋耗形體支離念官
守之尚遙迫王程之有限內省尪羸之質豈堪撼頓之勞非敢自
愛於疲癯實懼仰慙於任使幸脩門之在望恃延閣之見收叫聞
自言伏質俟罪蓋疾痛之加者呼父母而是懇精誠之至者動金
石而非難果上惻於淵衷俾曲從於私便維茲藩輔密邇京師事

簡民滄首被朝廷之化里安戶佚稀聞枹鼓之音顧臣何人獲此善地可覲康寧之福皆緣覆護之恩矧常守於是邦有相望之仲氏流風未遠故事可詢重念臣昨守汝陰亦隸畿右始引小嫌而求避出於慮患之太周終明大體而復還良以至公之在上銘心敢怠粉骨難酬此蓋伏遇皇帝陛下聰明燭於下微而隆寬盡下威德加於九有而內恕及人篤遺簪墜履之仁推藏疾納污之誼太皇太后陛下處奧室之中而周知萬事據崇高之勢而洞照羣情常懷大德之好生不忍匹夫之失所憫臣忝陪侍從之末察臣實嬰沈瘵之餘假借寵靈安全孤朽臣敢不體上之慈而哀矜于下念已之病而綏養斯民庶收塵露之微少答乾坤之施

賀元祐四年明堂禮成肆赦表

曾肇

侑帝饗親既金聲而玉振赦過宥罪遂雷動以風行歡聲達於幅員協氣充乎上下竊以躬事天之禮莫如王者之堂極嚴父之心是謂聖人之孝講茲鉅典屬在熙朝卽路寢以親祠兆于仁祖黜

五精之並祭斷自神宗光昭前聞啟迪後嗣恭惟皇帝陛下紹膺寶命祇適先猷平成百度而不有其功覆載羣生而不尸其德謂時和歲豐之效乃高穹顧諟而然謂刑清武偃之祥乃七廟威神之致矧屬承祧之始永懷濡露之恩將伸報本之誠且展事生之道以祭恐數而瀆故遵三歲之期以郊則遠而疏故度九筵之位季秋令月吉日上辛備法駕之儀協雅聲之奏牲牲博碩籩豆靖嘉元龜大輅之旅陳篆轂錯衡之輻湊并柯共柢按圖謀而充庭鬚首貫胷衽衣冠而就列以引以翼有壬有林奠珪幣以告虔舞羽旄而象德靈心合答精意感通嘉得四海之懽增授萬年之策尙念有司之庶獄豈無弗獲之一夫乃御端闈亟敷大號滌瑕盪穢已責逮鰥空狴犴而縱縲囚開府庫以賜軍士布慶施德昭天漏泉彼泣辜弛網之仁推食解衣之惠方之於此不其狹歟臣忝綴從班適分州寄莫與奉璋之列徒懷拱極之心

南京謝上表

曾肇

得郡便私未報期年之政因人易地更分京邑之權朝始去於故
棲夕已臨於新部伏念臣材不堪於巨用行有愧於古人蚤塵侍
從之華寢冒藩垣之寵未踰再歲更守二州既不能興教化於民
使之遷善而遠罪又不能作聰明於外因以譁世而取名惟殫夙
夜之勤期副焦勞之念矧彼淮陽之地舊爲楚國之郊屬頻年昏
墊之餘加比屋凶饑之後浚溝隍以疏積潦發廩庾以振流民方
竭力於經營遽蒙恩而罷徙國家別建都邑內壯皇居維王迹之
所基視它邦而尤重掌離宮之筦籥奉原廟之衣冠以屬微臣彌
慚非據此蓋伏遇皇帝陛下矜憐舊物優假近班尙容環走於王
畿因使周知於土俗奉承清問敢希宣室之歸攀仰末光未覺長
安之遠誓當盡瘁少冀分憂至於事鞭扑以立威飾厨傳以干譽
非明時之所尙亦私義之不爲

徐州謝上表

曾肇

懷章去國不啻三年荷橐入朝未淹百日復棲遲於民社驟違遠

於闕庭迫義理之當然豈人情之所願竊念臣稟性固陋承學迂
疎懷是古之至愚抱守官之獨見豈特難堪於世用固已不善於
身謀昨者召自留都處之宗伯屬郊丘之肇祀議天地之經祠執
禮雖明趣時則戾已行之令豈孤論之能回不韙之誅敢偷安而
苟免旋抗章而請學蒙易地以示恩繼露微衷復頒溫詔終賴乾
坤之造曲成犬馬之私假以使符置之善地循行閭里固多魚稻
之饒周覽山川頗有江湖之趣夫何孤蹇獲此便安此蓋伏遇皇
帝陛下寬裕有容包函徧覆將以招致芻蕘之論是用特寬斧鉞
之威伏惟恩慈豈易報稱臣身雖在外義不忘君況仰賴於皇明
忍自愆於素守深念長人之寄知無不爲益堅許國之誠死而後
已

南京謝上表

曾肇

以儒懦而辭將符以親嫌而避邊要頗識事君之義敢干留令之
誅仰賴聖明俯矜誠請既逃罪戾仍獲便安伏念臣無所取材粗

知嚮道雖險阻艱難備嘗之矣而造次顛沛必於是焉以平生寡
偶而少徒故臨事易危而多畏昨祈外補聊避煩言未容墨突之
黔遽改并門之帥且節制方面號爲儒者之榮率先戎行正是人
臣之分便當卽路詎敢懷私但以任非所長力有不逮矧弟兄之
孤立擅將相於一時中懼滿盈外虞讒閒再瀝顛天之懇終蒙易
地之優維陳宋之奧區首東南之甸服周流三國俛仰十期何幸
衰年復尋故步望千門之宮闕識三后之衣冠合抱干雲或異時
之拱把峩冠束帶多前日之佩觿所愧薄材曾微惠政下孤民望
上誤國恩此益伏遇皇帝陛下舜智兼容堯仁徧覆初無心於予
奪皆因物之短長是致孤生與叨平施毋輕民事方竭力於茲辰
苟利公家誓捐軀於異日

賀冊皇后表

曾肇

中闈肇建盛禮興行人神協謀夷夏胥慶竊以國家爲天下之本
后妃實王化之基致治所繇求端非遠恭惟皇帝陛下紹天駿命

垂世永圖承七廟之吉蠲奉三宮之共養而長秋虛位六職曠官
咨求淑人來相宗事上遵太母之訓下採有司之言鼓鍾在庭典
冊備物坤元博厚已正於隆名婦順章明可風於率土臣身雖在
外義不忘君誦造舟之詩想見光輝之盛申彤管之戒庶幾補報
之忠

賀上傳國寶表

曾肇

受命之符爲時而出自天之祐維聖是承方拜貺於大庭遽均恩
於率土官師動色海寓蒙休臣聞夫國璽之有去來猶周鼎之有
輕重好治而惡亂舍昏而卽明頃自有唐之衰荐更五代之季伏
而不發殆且百年忽爾自歸將傳萬世所以表祖宗積累之慶告
社稷靈長之休在聖與仁宜昌而壽恭惟皇帝陛下沈潛迪哲剛
健好生參天地以成能垂子孫而作則果有神物是貽皇家固將
配甘露以紀元豈止擬芝房而度曲臣職專守土志切慕君講稱
壽之儀阻陪下列奏升中之頌敬俟方來

宣州謝上表

曾肇

信而後諫愧無平仲之言罪不容誅誤脫成湯之網屈嚴科而賦命畀善地以寧親聖澤隆寬自古未有愚心感激欲報何從伏念臣蔽蒙之人迂闊於事以直道爲敬天之實以詭情爲駭俗之非殺其身有益於君行之無悔見其利不顧其義死莫敢爲知萬折而必東故三已而無愠汲黯之躑躅寧免世嫌子文之忠蓋出天性切服兩宮之知遇稍希八彥之激昂故有橫逆之來曾無左右之助口欲清而愈濁外無正而不行獨傷忠敬之難明亟比欺誣之重坐旣免投於荒裔仍擇處於近藩風俗休戚在所漸摩朝夕旨甘得其順適道固隆於善貨恩尤著於曲成此蓋伏遇皇帝陛下聽德惟聰使臣以禮兼洪覆無私之運均大明徧照之神謂好言利病者有區區憂國之心謂不事權貴者非汲汲謀身之輩方免官而從眾竟薄責以勸忠臣敢不敬體惠慈退加修省凡正心而誠意必明辨而篤行金石可磨底慎子臧之達節死生不變庶幾

徐邈之有常彈夙夜治民之勞全始終報上之志

鄂州謝上表

張商英

布宣溫詔開諭遠民雖湖山千里之間如哺醵一堂之上聽歡聲之相告慙其理之非良伏以旁接九江前臨七澤地遐而陋俗魯以愚雖有沈寃莫能往愬至於極病祇自悲吟蒙被皇明申頌德意所謂率科嚴重鉤考碎煩方田擾安業之農園土聚徙鄉之惡省租紐折公帑貪求學校驅迫者或違其孝養之心保伍追呼者或失於耕桑之候寺觀培繕營之費東南配漕輓之舟抑認香鹽強招卒伍文移速於星火追捕遍於里閭百端紛更一切蠲罷可謂崇寧之孝治眞爲紹述之聖功而臣初效外官恭承嘉命唯憂疲懦未克推行豈有設施可圖報稱有君如此碎首以之此蓋伏遇皇帝陛下誠實應天典常師古王路以平其好惡道樞以會其是非察臣於元祐之間未嘗干預憐臣於元符之末首被擠排一洗刑書再還仕籍退循衰晚虛辱寵榮辟穀留侯歸休有素據鞍

宋文鑑卷第七十
馬援進取何堪誓堅忠孝之心永保初終之節

宋文鑑卷第七十

宋文鑑卷第七十一
表

明州謝到任表

蔡肇

代范德孺戶部表

廖正

謝昭雪表

劉歧

謝吏部侍郎表

鄒浩

謝復官表

鄒浩

代范忠宣公遺表

李之儀

通州自便謝表

陳瓘

進四明尊堯集表

陳瓘

台州羈管謝表

陳瓘

明州謝到任表

蔡肇

失職之誅尙容自劾非常之寵更以曲加弗獲固辭具嚴名訓叨
塵特甚感涕難勝臣間人有能有不能聖主量材而受職仕或去

或不去人臣秉義以事君儻已試而可知敢懷安而自止雖君父保全之恩厚不汝瑕疵顧國人可否之論公有靦面目伏念臣昨繇省戶擢置詞垣盡出聖神獨斷之明本無左右游談之助然名過其實者殆用非所習則窮況逢聖治之日新竊仰睿文之天縱咸池張洞庭之野海鳥炫驚秋水灌涯涘之間波臣自蕩莫知攸濟宜厚厥愆敢期全度之恩更溢褒嘉之典既聯法從仍昇名城恭惟皇帝陛下如天覆臨以生以遂薄海內外悉主悉臣眷甌粵之偏陬控東南之美浸鱗蛟霧溼之所蟠鬱夷隸舸舶之所往來方旋反於使軺將嗣修於貢職謂宜推擇以重拊循而臣結約無奇閒關少與徙谿潭之醜類素乏雄文羸賈客之購金初無佳句矧今郡國守令之政具存典謨訓誥之書奉以周旋雖不能識其大者求之度數庶幾或推而行之有以及民是爲報國

代范德孺謝戶部表

廖正

邊部終更王庭當觀亟承天寵遽寘地官靜以省躬忸乎就列臣

降才蹇淺志學顛蒙早遇盛時荐膺煩使饋糧千里嘗絕漠以知難勤戍六年屬鑄羗之未諭俯思前訓敢妄覬於功名仰奉睿謀務久寧於封略僅逃餘責竊願投閑惟邦計之實繁須賢勞而共濟乃容疎遠誤被選掄臣早預搢紳特緣承胄朝廷不掩其遺直兄弟相戒以盡忠豈謂馴致高華迭居要劇征西合符而相代省戶接軫而並游眾謂榮觀臣知非據陛下天均覆育聖監清明政在節財方且度縣官之用人無求備固將觀臣庶之能當勤早夜之思庶有毫銖之補

謝昭雪表

劉歧

投屏讒人已悟告言之妄蠲除詔令更申論坐之寃沒而有知死且不朽竊以前世論事下敢告之章法家原情著反坐之律未聞私書謬悠之謗可致公朝夷滅之刑繁彼無良遭爲不令因黨友之尺牘形閭巷之有辭引鷹揚尙父之言誦高貴鄉公之語靡慚嗤鄙惟幸詆誣旣內慊於不根又陰虞於後患禱其付火固絕意

於上聞託以屏人復何施於參驗不攻自破欲蓋而彰巧誰謂其如簧市共知於無虎雖毀者挾怨必以惡聲而小人乘危遂為奇貨密騰舊札歷遺眾仇險不啻於山川食無餘於犬豕逮從吏訊幾誤國章意所株連人以股栗浩有漂山之勢岌如累卵之危賴先帝照矚之明察權臣吞噬之患特迂清問少緩嚴科然而先臣諸孤終以屏廢闔門百口益復幽囚禦瘴癘者十喪隸臣妾者三歲無罪且至於如此大戮亦何以復加會上聖之龍飛破羣疑而冰釋譴累所逮訴告必申悼前日之禍機嗟何可及掛有司之罪籍名或未除用再瀝於肺肝敢上塵於旒展理無難者宜靡悼於改為事已灼然遂悉從於釐正此蓋皇帝陛下乾行以健離麗而明體大舜聖讒之方廣有唐辨謗之略孤忠素節事已白於九原弱子幼孫誓各堅於一死微生何算洪造難酬

謝吏部侍郎表

鄒浩

代言西掖已冒至榮列職中臺更塵高選拜恩優渥撫已兢慚中

竊以六典治邦周重天官之任三銓綜吏唐推文部之權洪惟神考之正名肇復先王之成憲迄至今日益昭聖功宜得真材以貳選事而臣猥從廢斥特荷哀憐俄擢寘於近班獲預聞於機要事陛下有如上帝敢萌一念之欺仰陛下何啻高山終乏纖埃之補未正空飡之責遽叨越次之陞靖言思之可謂幸矣此蓋伏遇皇帝陛下孝隆繼志道廣用中欲多士之無朋故孤立者與進欲四方之不擾故愚守者并容爰舉斯心俾祗厥序臣敢不激昂遭遇飭厲猷為念此餘生實神聖之再造誓殫綿力稱寵祿之殊私

謝復官表

鄒浩

萬里投荒豈生還之敢望九重獨斷俄意外以蒙恩感激哀憐縱橫涕淚伏念臣最為固陋全昧幾微有言輒至於妄陳雖死不足以塞責上賴聖人之救物特寬司寇之嚴刑但復竄於遐方始使省其往咎惟昭潭之可畏與新州而不殊形影自隨朝夕難保昏昏瘴霧信為提耳之師兀兀愁居因得致身之道惟忠惟孝無古

無今命雖甚於垂絲心已期於結草不謂僅存之瘦骨忽還將絕之驚魂既獲免於拘攣遂亟諧於定省名蠲罪籍品復文階在技拭之非常皆覬覦之莫及此蓋伏遇皇帝陛下道彌天覆德盛春生千齡光御於不圖萬物率由於和氣紹隆先烈坐撫太平曲回進日之明旁燭戴盆之下謂裕陵長育賜之第而除教官謂哲宗保全務其愚而屈常法召從五嶺之表端遇六龍之飛擢于不次之中曾是惟新之數肆令甄敘俯及孤危臣敢不因險阻艱難之備營念身體髮膚之再造益堅夙志遙瞻北極之尊長與老親共祝南山之壽精誠所貫高厚必知

代范忠宣公遺表

李之儀

臣聞生則有涯難逃定數死之將至願畢餘忠輒留垂盡之期仰瀆蓋高之聽中謝伏念臣賦性拙直稟生艱危忠義難得之家傳利害率同於人欲未始苟作以干譽不敢患失以營私蓋當先天下而憂期不負聖人之學此先臣所以教子而微臣資以事君粵

自治平擢爲御史繼逢神考進列諫垣在萬五十二年首尾四十六任分符擁節持橐守邊晚叨宥密之求再席鈞衡之寄遇事輒發曾不顧身因時有爲止欲及物固知盈滿之當戒弗思禍釁之陰乘萬里風濤僅脫江魚之葬四年瘴癘幾從山鬼之遊忽遭睿聖之臨朝首圖纖介之舊物復官易地遣使宣恩而臣目已不明無復仰瞻於舜日身猶可免或能親奉於堯言豈事理之能諧果神明之見嗇未獲九重之入覲卒然四體之不隨空慙田畝之還上負乾坤之造猶且強親藥石貪戀歲時儻粗釋於沉迷或稍紓於報效今則膏肓已逼氣息僅存泉路非遙聖時永隔恐叩聞之靡及雖結草以何爲是以假漏偷生剗心瀝懇庶皇慈之俯鑒亮愚意之無他臣若不言死有餘恨伏望皇帝陛下清心寡欲約已便民達孝道於精微擴仁心於廣遠深絕朋黨之論詳察邪正之歸搜抉幽隱以盡人材屏斥奇巧以厚風俗愛惜生靈而無輕議邊事包容狂直而無易逐言官若宣仁之誣謗未明致保佑之憂

勤不顯本權臣務快其私忿非泰陵實謂之當然以至未究流人之往愆悉以聖恩而特敘尚使存歿猶污瑕疵又安得未解疆場之嚴遂空帑藏之積有城必守得地難耕凡此數端願留聖念無令後患常軫淵衷臣所重者陛下上聖之資臣所愛者宗社無疆之業苟斯言之可采則雖死而猶生淚盡詞窮形留神逝

通州自便謝表

陳瓘

恩由獨斷澤被孤忠刑部之執守雖堅天子之福威無壅乃公朝之盛事豈小己之私榮恭敘感悰仰贖高聽中謝伏念臣昨蒙善貸賜以生還萍跡孤睽久寄食於異縣華門幹蠱常委事於長男所營不足以藩身其出每緣於餬口去庭闈者累月聞道路之一言耳受而輒行親危而不顧緣帥司深疾其生事故傳者多指為病狂萬口嗷嗷兩路詢孤突致子素存不二之風曾參殺人寧免至三之惑事既匿而難曉時浸久而益疑制所深嚴就逮於重江之外獄辭平允閱實於片言之中矜其無罪之可書許以還家

而自便出園扉而涕感瞻魏闕而神留尋沐寬恩移置近地海島萬里不如無子之無憂淮壖一身彌覺有生之有患擢髮不足以數臣之罪瀝血不足以寫臣之心羔羊之性自公犬馬之情愛主忘身徇國初無係悵之私抱疾呼天惟恃精誠之格忽因詔諭特免拘維此蓋伏遇皇帝陛下堯大并容舜明洞照人人皆使之得所事事唯恐其有偏繼志用神考之心應天以格王之實舊弊若冰之將釋新慶如川之方流家國平康內外交泰遂使赦令昔阻隔而今行士有宿愆始棄置而終宥全家荷德無路酬恩螻蟻之力至微但知恭順蒲柳之身已老尚可糜捐望雖隔於戴盆向敢忘於傾藿

進四明尊堯集表

陳瓘

臣竊以眈眈愛君精誠雖至芻蕘議政迂闊難行葵向不習而常傾芹陋敢期於得獻獨因睿斷許貢危衷中謝伏念臣糞土下材犬馬賤質數罪固多於擢髮舍生無意於兼魚初欲糜捐終難緘

默因續前言之緒聊輸垂絕之忠非敢有善善惡惡之辭但欲明
尊尊卑卑之義此螻蟻所能知也在縉紳安可藐然八十卷之私
書奪此與彼十九年之懿績可從而違陛下於繼述之初首辨明
於茲事微臣持將順之志在流竄而靡忘鋪張痛詆之言編類厚
誣之語初謂熙寧之輔不媿有商之臣於成湯敢肆厥欺疑安石
有所弗忍及究觀於懟筆始粗見其游辭因思大典之久誣益願
忘軀而往訴合浦十論申舊疏之餘言四明八門撮其要於一序
實欲彰火德之盛不敢畏王氏之強寧碎首於邦誅忍謾心於國
是彼效尤於往轍亦苟違於陳編難以縷闕略舉綱要謂藝祖濫
誅無罪謂真宗矯誣上天訕薄裕陵攘奪先美以託訓為箝口之
術以歸過為自譽之媒但矜詆訾之極工罔顧威靈之如在幾乎
罵矣豈不痛哉讀其書寧忍終篇稽其文可為流涕代言之筆盡
目其徒為儒宗首善之宮筆望其形為坐像禮官舞禮而行詔史
書獻佞而請觀光乎仲尼乃子雱聖父之贊比諸孔子實卞等輕

君之情彼衰周之僻王棄真儒之將聖當時不得配太廟之饗後
世所以廣上丁之祠今比安石為欽王之臣則方神考為何代之
主又況一人幸學列辟班隨至尊拜伏於爐前故臣驕倨而坐視
百官氣鬱多士心寒自有華夏以來無此悖倒之禮神考之再相
安石始終不過乎九年安石之屏迹金陵棄置不召者十載八字
威加於鄧綰萬機獨運於元豐豈可於善述之時忽崇此不遜之
像因壞先朝三舍之法遂費今日千倍之財人材之可擢不殊國
用之添費徒廣浚吾民之膏血增彼像之精神美成其私怨集于
國陸贄設枝顛之喻承業以財盡為憂忠哉古人愛君之誠異乎
今日養士之意又況臨川之所學不以春秋為可行謂天子有北
面之儀謂君臣有迭賓之禮禮儀如彼名分若何此乃衰世侮君
之非豈是先王訪道之法贛川舊學記刊于四紀之前辟水新靡
像成於一壻之手唱如聲召應若響隨使王氏浸至於強梁乃元
祐助發其氣焰昔宣仁權同之際謂介甫節行甚高宜贈崇官仍

加美謚司馬光書之于簡呂公著行之於朝不以稽弊爲心徒發
鎮浮之議負安石者重加黜責欺神考者略不誰何遂至於枝蔓
而難圖豈非由偏助之太過雖當時未見誣史而先朝自有聖批
恬不奉行養成乖悖蒙蔽裕陵之眾美眩耀鍾山之一書四輔之
行謀畫本生於日錄三衛之設規模初定於新經密密乎鄧蹇之
安排草草乎京摠之傳授考其音聲則箎唱而壎和譬諸手足則
左弱而右強凝如冰山烈若原火愚公老矣益堅平險之心精衛
眇然未捨填波之願歿而後已志不可渝望雖隔於戴盆夢不忘
於馳闕丹誠上格天語遙詢要觀尊主之恭緩議奸時之罪淵冰
在念梟磔寧逃恭惟皇帝陛下天大普容日明徧照覽熙豐記動
之史倣虞夏採詩之官咨輿議於多方證私書之百毀舜纂堯緒
孜孜乎善繼之勤武廣文聲斤斤乎丕承之美茲所謂一人之慶
可以得萬國之歡凡有識知孰不將順天地尊卑之已定首足上
下之宜分孔志在乎春秋漢律嚴於名分戴土者皆知此義尊堯

者豈獨臣書燕馬以市骨爲先鬻驥者必將來矣鄭校決防川之
壅有舌者其忍默乎臣命可危眾口難遏伏望皇帝陛下念臣役
志於享上憫臣積禍於敢恭以尺朽之廢材貢一得之愚慮言多
妄發事則有稽宣宗當紹憲之時寧容德裕之奪語武帝以述景
爲事忍視馬遷之短辭父子至情古今一揆不懲謗史之罪則何
以謝過於宗廟不毀坐像之悖則何以示順於華夷國是方強勢
難遽改大器至重要在深思庶乎苗莠之分始於冠屨之辨至美
成於剛健大患生乎因循儒宗數人自是一家之說聖主獨斷乃
爲我宋之休天心篤愛之甚明人情企想而有待解神考在天之
怒成聖主奉先之仁克果斷於蔡方人將大覺善光揚於堯績上
可無爲於一顰一笑之中成允文允武之業臣將獻駿憲太平之
頌豈特進狂簡不裁之書曾臆無奇但盡恭於文字筋骸已億當
致命於君親仰酬再造之恩退聽一成之議闔門待盡殞首知歸

台州羈管謝表

陳瓘

奉聖旨陳瓘自撰尊堯集語言無緒盡係詆誣不行毀弃送與張
商英意要行用特勒停送台州羈管令本州當職官常切覺察不
得放出州城月具存在申尙書省臣卽時望闕謝恩發離本家水
陸兼行不敢住滯今於十一月初十日已到台州城內者畎畝之
志一書可通芻蕘之言萬里不隔集羣辭而上達遭一覽以爲榮
竄路雖遙陳情已畢中謝伏念臣材如糞土身若梗蓬非敢以著
書爲能所陳者戴君之義如詆誣之不可志在尊堯豈行用之敢
私心唯助舜語言無緒議論至迂獨歸美於先猷遂大違於國是
不行毀弃有誤咨詢虛消十載之光陰靡恤一門之溝壑果煩揆
路特建刑章若非恃庇於九重安得延齡於再造由淮入浙自通
至台怒濤雖阻於重江毒瘴幸殊於五嶺尙留頂踵獨賴君親此
蓋伏遇皇帝陛下天大并容日明洞照以至慈而善貸推觀過之
深仁憫此顛隳欲其存在以身償怨螻蟻之命至微徇國捐生犬
馬之心未替夢馳丹闕目想清光重干擢髮之誅徒鬱戴盆之望

餘生易捨大德難酬

宋文鑑卷第七十一

Blank columns for text within the main frame.

宋文鑑卷第七十一

八

十二